

漢魏六朝百三家集

梁

沈隱侯

第七十四冊

EAST ASIAN LIBRARY  
RM 8049 ROBARTS LIBRARY  
UNIVERSITY OF TORONTO  
TORONTO, CANADA M5S 1A5

v. 74







沈隱侯集卷之二

梁吳興沈約著

明太倉張溥閱

連珠

連珠二首

臣聞烈風雖震不斷蔓草之根，朽壤誠微遂實  
崇山之峭，是以一夫不加威於赫怒，千乘必致  
亡於巧笑。

臣聞鳴籟受響，非有志於要風，涓流長邁，甯厝



心於歸海是以萬竅怒號不叩而咸應百川是  
納用畢而爲宰



記

枳園寺刹下石記

佛教東流、適末尤著、始自洛京、盛於江左、晉故  
車騎將軍瑯琊王邵立、悟獨曉、信解淵微、於太  
祖文獻公清廟之北、造枳園精舍、其始則芳枳  
樹籬、故名、因事立、雖房殿嚴整、而瓊刹未樹、邵  
立孫尚書僕射南徐州大中正、奐深達法相、洞  
了宗極、勤誠外著、仁隱內弘、食不過中者一十  
一載、雖翼務朝端、而事隣柰圃、日者作翰湘州、



樹塵蠡服、位與年升、秩隨歲厚、顧惟思隆主盼、  
寵結皇情、任處東方、寄深外屏、徒欲盡能竭慮、  
知無不爲、下被民和、上宣聖澤、而自以力弱途  
遠、終慚短効、且義止今生、報褰來果、非所以酬  
鴻貺於冥津、暢丹誠於遐劫、自乘傳衡臯、辭簪  
派渚、誓於舊寺、光樹五層、捐割藩俸、十遺其一、  
凡厥所收、三十有六萬齊之、永明六年、六月三  
日、蓋木運將啓之、令辰上帝步天之嘉日、乃抗  
崇表於蒼雲、植重扃於玄壤、仰願宸居納祐、福



履攸歸，八神擎室，萬祇翼體，寶祚隆邈，比固須  
彌，靈筭遐永，齊軌常住，諸聖延祥，挹天和於少  
極，藩王碩茂，播宗英於梁楚，羣后流克讓之風，  
庶民垂可封之德，含生愷樂，物不天性，嘉穀年  
登，餘糧栖畝，夷荒內附，邊城解桡，家備十善，人  
懷六度，魔衆稽顙，外道屈膝，抽薪止火，折劒摧  
鋒，拯幽酸於無擇，陟神化於有頂，三界五道，咸  
同斯願，刊石重壤，式昭厥心。

齊竟陵王題佛光記



夫理貫空寂，雖鎔範不能傳，業動因應，非形相  
無以感，是故日華月彩，炤曜天外，方區散景，咫尺  
塵方，太祖皇帝濯襟慧水，凝神淨域，厭世珍  
陛，遷靈寶地，竟陵王諱泣明臺之下，臨慟高山  
之方，遠慕迸王鑾，情殷雙樹，永惟可以炳發神  
功，崇高妙業，莫若式金寫好，資巧匠傳儀，以皇  
齊之四年，日子敬制釋迦像一軀，尊麗自天，工  
非世造，色符留影，妙越檀香，俾穀林之思，永旌  
於萬劫，用刊徽迹，式垂不朽云爾。



碑

桐栢山金庭館碑

夫生靈爲貴，有識斯同。道天云及，終天莫反。故  
仙學之秘，上聖攸尊。啓玉笈之幽文，貽金壇之  
妙訣。駐景濛谷，還光上枝。吐吸煙霞，變煉丹液。  
出沒無方，升降自巳。下栖洞室，上賓羣帝。覩靈  
岳之驟啓，見蒼波之屢竭。望玄洲而駿驅，指蓬  
山而永驚。芝蓋三重，駕螭龍之蜿蜒。雲車萬乘，  
載旗旆之逶迤。此蓋栖靈五嶽，未暨夫三清者。



也。若夫上玄奧遠，言象斯絕，金簡玉字之書，玄  
霜絳雪之寶，俗士所不能窺，學徒不敢輕慕，且  
禁誓嚴重，志業艱劬，自非天稟上才，未易可擬。  
自惟凡劣，識鑒鮮方，徒抱出俗之願，而無致遠  
之力，卑尚幽栖，屏棄情累，留愛巖壑，託分魚鳥。  
塗愈遠而靡倦，年既老而不衰。高宗明皇帝以  
上聖之德，結宗玄之念，忘其菲薄，曲賜提引，未  
自夏汭，固乞還山。權憇汝南縣境，固非息心之  
地。聖主纘厯，復蒙縶維，永泰元年，方遂初願，遂



遠出天台、定居茲嶺、所憇之山、實惟桐栢、靈聖  
之下、都五縣之餘地、仰出星河、上參倒景、高崖  
萬沓、遂澗千迴、因高建壇、憑巖考室、飾降神之  
宇、置朝禮之地、桐栢所在、厥號金庭、事曷靈圖  
因以名館、聖上曲降幽情、畱信彌密、置道士十  
人、用祈嘉祉、約以不才、首膺斯任、永棄人羣、竄  
景窮麓、結懇志於玄都、望霄容於雲路、仰宣國  
靈、介茲景福、延吉祥於清廟、納萬壽於神躬、又  
願道無不懷、澤無不至、幽荒屈膝、戎貊稽顙、息



鼓輟烽守在海外因此自勉兼遂微誠日久勤  
劬自強不已翹心屬念晚卧晨興食正陽於停  
午念孔神於中夜將三芝而延伫飛九丹而冥  
息乘鳧輕舉留易忘歸以茲丹款表之玄極無  
曰在上日鑒非遠銘石靈館以旌厥心其辭曰  
道無不在若存若亡於惟上學理妙羣方用之  
日損言則非常儵焉靈化羽衣霓裳九重堯光  
三山璀璨日爲車馬芝成宮觀虹旌拂月龍輶  
漸漢萬春方華千齡始旦伊余菲薄竊慕隱淪



尋師講道。結友問津。東採震澤。西遊漢濱。依稀  
靈眷。髣髴幽人。帝明紹歷。惟皇纂位。屬心鼎湖。  
脫屣神器。降命凡底。仰祈靈秘。瞻彼高山。興言  
覆簣。啓基桐栢。厥號金庭。喬峰迴峭。擘漢分星。  
臨雲置壇。駕岳開櫺。澗塗蹇產。林祈葱青。誰謂  
應遠。神道微密。慶集宮闈。祥流罕畢。其久如地。  
其恒如日。壽同南山。與天無卒。樂生變煉。外示  
無功。少君飛轉。密與神通。因資假力。輕舉騰空。  
庶憑嘉誘。永濟微躬。



法王寺碑

昔周師集於孟津、漢兵至於垓下、翦商肇乎茲地、殪楚由乎斯域、慧雲匪由觸石、法雨起乎悲心、驅之仁壽、度之彼岸、濟方割於有頃、樸旣燎於無邊、陸旗風靡、水陣雲披、縈山爲堞、失其九天之險、負壑爲隍、曾無一葦之閼、昏師反接、僞牧泥首、掬指則河舟尚虛、委甲則熊嶺非峻、乃按兵江漢、誓衆商郊、因斯而運斗樞、自茲而廓天步、業隆於夏、功高代殷、濟橫流而臣九服、握



乾綱而子萬姓，眷言四海莫不來王。此惟余宅，甯止西顧。臨朝夕之濬池，帶長洲之茂苑。藉離宮於漢舊，因林光於秦餘。迴廊敞匝，複殿重起。連房極眺，周堵如雲。銘曰：

往劫將謝，災難孔多。炎炎烈火，淼淼洪波。聚爲丘岳，散成江河。俗緣浮詭，真諦遐長。匪因希尚，曷寄舟梁。標功顯德，事歸道場。祁祁法衆，同茲無我。振錫經行，祇林宴坐。或期寂滅，或念薪火。惆悵三明，徘徊四果。



善館碑

至道玄妙無跡可尋，寄言立稱，已乖宗極。神宇  
靈房，於義非取。九僊緬邈，等級參差。或藏形洞  
府，或栖志靈岳。達人獨往之事，志非易立。餐松  
飲澗之情，理難輕樹。止欲漸去喧囂，稍離塵雜。  
於是旣加整葺，營建堂宇。北負崇岳，南枕修衢。  
迴託人表，雞犬相絕。庭流松響，戶接雲根。指瓊  
樹而朝餐，就瑤臺而夜息。霓裳不反，鳬舄忘歸。  
朝九星，謁厯帝。悠哉邈乎，與天地相畢矣。



齊故安陸昭王碑

公諱緬字景業南蘭陵人也稷契身佐唐虞有大功於天地商武姬文所以膺圖受籙蕭曹扶翼漢祖滅秦項以甯亂魏氏時乘於前皇齊握符於後靈源與積石爭流神基與極天比峻祖宣皇帝雄材盛烈名蓋當時考景皇帝含道居貞卷懷前代公含辰象之秀德體河岳之上靈氣蘊風雲身負日月立行可模置言成範英華外發清明內昭天經地義之德因心必盡簡久



遠大之方率由斯至、挹其源者、游泳而莫測、懷  
其道者、日用而不知、昭昭若三辰之麗于天、滔  
滔猶四瀆之紀于地、六幽允洽、一德無爽、萬物  
仰之而彌高、千里不言而斯應、若夫彈冠出仕  
之日、登庸蒞事之年、軍麾命服之序、監督方部  
之數、斯固國史之所詳、今可得畧也、水德方衰、  
天命未改、太祖龍躍俟時、作鎮淮泗、如仁夕惕  
之志、中夜九迴、龕世拯亂之情、獨用懷抱、深圖  
密慮、衆莫能窺、公陪奉朝夕、從容左右、蓋同王



子洛濱之歲。實無辟疆內侍之年。起予聖懷。發  
言中旨。始以文學遊梁。俄而入掌綸誥。蘭桂有  
芬。清暉自遠。帝出於震。日衣青光。方軌茅社。俾  
侯安陸。受瑞折珪。遂荒雲野。式掌儲命。帝難其  
人。公以宗室羽儀。允膺嘉選。協隆三善。仰敷四  
德。博望之苑。載暉龍樓之門。以峻獻替。帷宸實  
掌喉脣。奉待漏之書。銜如絲之旨。前暉後光。非  
止恒授。公以密戚上賢。俄而奉職。出納惟允。劔  
璽增華。伊昔帝唐。九官咸事。熊豹臨戴。納言是



司自此迄今其任無爽爰自近侍式贊權衡而  
皇情眷眷慮深求瘼姑蘓與壤任切關河都會  
殷負提封百萬全趙之衽服叢臺方此爲劣臨  
淄之揮汗成雨曾何足稱乃鴻騫舊吳作守東  
楚弘義讓以勗君子振平惠以字小人撫同上  
德綏用中典疑獄得情而弗喜宿訟兩讓而同  
歸雖春申之大啓封疆鄧攸之緝熙氓庶不能  
尚也夏首藩要任重推轂衿帶中流地殷江漢  
南接衡巫風雲之路千里西通鄭鄧水陸之塗



三七、是惟形勝、閭外莫先、建麾作牧、明德攸在、  
乃暴以秋陽、威以夏日、澤無不漸、螻蟻之穴、靡  
遺、明無不察、容光之微、必照、由近而被、遠自己  
而及、物惠與八風俱翔、德與五材並運、遠無不  
懷、邇無不肅、邑居不聞夜吠之犬、牧人不覩晨  
飲之羊、譽表六條、功最萬里、還居近侍、兼饗戎  
秩、候府寄隆、儲端任顯、東西兩晉、茲選特難、羊  
琇願言而匪獲、謝琰功高而後至、升降二宮、令  
績斯俟、禁旅尊嚴、主噐彌固、禹穴神臯、地埒分



陝江左以來常遞斯任、東渚鉅海、南望秦稽、淵  
藪胥萃、藿蒲攸在、貨殖之民、千金比屋、郭壘之  
內、雲幄萬家、刑政繁舛、舊難詳一、南山羣盜未  
足云多、渤海亂繩、方斯易理、公下車敷化、風動  
神行、誠恕旣孚、鈎距靡用、不待赭汗之權、而奸  
渠必翦、無假里端之籍、而惡子咸誅、被以哀矜、  
孚以信順、南陽葦杖、未足比其仁、潁川時雨、無  
以豐其澤、公攬轡升車、牧州典郡、感達民祇、非  
待期月、老安少懷、塗歌里詠、莫不歡若親戚、芬



若椒蘭麾旆每反行悲道泣攀車臥轍之戀爭  
塗忘遠去思一借之情愈久彌結方城漢池南  
顧莫重北指崤潼平塗不過七百西接嶢武關  
路曾不盈千蠻陬夷獫重山萬里小則俘民畧  
畜大則攻城剽邑晉宋迄今有切民患烽鼓相  
望歲時不息椎埋穿掘之黨阡陌成羣傲法侮  
吏之人曾莫禁禦累藩咸受其弊厯政所不能  
裁加以戎羯窺窬伺我邊隙北風未起馬首便  
以南向塞草未衰嚴城於焉早閉永明八載疆



場大駭天子乃心北眷聽朝不怡揚旆漢南非  
公莫可於是驅馬原隰卷甲遄征威令首塗仁  
風載路軌躅清晏車徒不擾牛酒日至壺漿塞  
陌失義犬羊其來久矣徵賦嚴切唯利是求首  
鼠疆界災蠹彌廣公扇以廉風孚以誠德盡任  
案置水之情弘郭伋待期之信金如粟而弗覩  
馬如羊而靡入雛雉必懷豚魚不爽由是傾巢  
舉落望德如歸椎髻墜首日拜門闕卉服滿塗  
夷歌成韻禮義旣敷威刑具舉彊民獷俗反志



遷情風塵不起、囹圄寂寞富商野次宿秉停蓄  
蜾蝗弗起豺虎遠跡北狄懼威關塞謐靜偵謀  
不敢東窺駝馬不敢南牧方欲振策燕趙席卷  
秦代陪龍駕於伊洛侍紫蓋於咸陽而遘疾彌  
留歟焉大漸耕夫釋耒桑婦下機參請門衢並  
走羣望維永明九年夏五月三十日辛酉薨春  
秋三十有七城府颯然庶寮如賁男女老幼大  
臨街衢接響傳聲不踰時而達於四境夷羣戎  
落幽遠必至望城拊膺震動郭邑並求入奉靈



櫬、藩司抑而弗許、雖鄧訓致劈面之哀、羊公深  
罷市之慕、對而爲言、遠有慚德神駕東還、號送  
踰境、奉觴奠以望靈、仰蒼天而自訴、震響成雷  
盈塗咽水、公臨危審正、載貽話言、楚囊之情、惟  
幾而彌固、衛魚之心、身亡而意結、二宮軫慟、遐  
邇同哀、追贈侍中、領衛將軍、給鼓吹一部、謚曰  
昭侯、時皇上納麓在辰、登庸伊始、允副朝端、兼  
掌屯衛、聞凶哀震、感絕移時、因遘沉痾、綿留氣  
序、世祖日夜憂懷、備盡寬譬、勉膳禁哭、中使相



望上雖外順、皇旨內殷、私痛獨居、不御酒肉、坐臥泣涕、霑衣、若此移年、癰瘡、改貌、天倫之愛、振古莫儔、及俯膺天眷、入纂絕業、分命懿親、台牧並建、對繁弱以流涕、望曲阜而含悲、改贈司徒、因謚爲郡王、禮也、惟公少而英明、長而弘潤、風標秀舉、清暉映世、學徧書部、特善立言、輦悅之麗、篆籀之則、窮六義於懷抱、究八體於毫端、奕思之微、秋儲無以競巧、取睽之妙、流睇未足稱奇、至公以奉上、鳴謙以接下、撫僚庶、盡盛德之



容交士林，忘公侯之貴。虛懷博納，幽關洞開。宴  
語談笑，情瀾不竭。譽滿天下，德冠生民。蓋百代  
之儀表，千年之領袖。曾不憚留，梁摧奄及。豈唯  
僑終蹇謝，興謠輟相而已哉！凡我僚舊，均哀其  
戚。怨天德之無厚，痛崇陰之不畱。思所以克播  
遺塵，敝之窮壤。乃刻石圖徽，寄情銘頌。其辭曰：  
天命玄鳥，降而生商。是開金運，祚始玉筐。三仁  
去國，五曜入房。亦白其馬，侯服周王。本枝派別，  
阿萊命氏。涉徐而東，義均梁徙。自茲以降，懷青



抱紫崇基巖巖長瀾瀾瀾惟聖造物龍飛天步  
載鼎載革有除有布高皇赫矣仰膺乾顧景皇  
蒸哉實啓洪祚喬嶽峻峙命世興賢應期誕德  
絕後光前幾以成務覺在民先位非大寶爵乃  
上天爰始濯纓清猷濬發升降文陛逶迤魏闕  
惠露霑吳仁風扇越涉夏踰漢政成期月用簡  
必從日新爲盛在上哀矜臨下莊敬草木不天  
昆蟲得性我有芳蘭民胥攸詠羣夷蠢蠢巖別  
嶂分傾山盡落其從如雲挈妻荷子負戴成羣



迴首請吏、曾何足云、昔聞天道、仁罔不遂、彼蒼  
如何、興山止簣、四牡方馳、六龍頓轡、斯民曷仰、  
邦國殄瘁、齊隕晏平、行哭致禮、趙徂昌國、列邦  
揮涕、况我君斯、皇之介弟、哀感徒庶、慟興雲陛、  
階毀留攢、川汎歸軸、競羞野莫、爭攀去轂、遵渚  
號追、臨波望哭、無絕終古、惟蘭與菊、塗由帝渚、  
朱軒靡駕、東首塋園、卽宮長夜、逝川無待、黃金  
難化、鐘石徒刊、芳猷永謝

豫章文憲王碑



世載冠冕之暉、家開配天之業、淇源邁於委水、  
雲峰冠於削成、公自天攸縱、非待河岳、道亞生  
知、德備藏往、摩赤霄而理翰、望閭闔以上馳、迴  
風颺於襟袖、宅山川於懷抱、爰初弱冠、藏器俟  
時、康莊廣闢、飾禮賢之館、杞梓備收、罄滋蘭之  
畹、旣駕朱驂、又敷袞職、升降軒陛、率由孝敬、謙  
以備物、貴以在身、再握勵已、三吐忘倦、公德惟  
民望、位冠朝首、儀表瑰雄、風神秀傑、每至三元  
首旦、華裔在庭、執玉端闈、冠冕百辟、外夷震聳、



猶單于之懼王商羣后瞻慕若衆星之俯日月、  
雖復以周公之親居周公之任、道格皇天、光被  
四海、而小善靡失、輜德必從、譬由畎澮匪讓、所  
以森致江河、土壤同歸、故能鬱成嵩岱、保翼三  
善、弘正九代、銘彼太常、懸諸日月、銘曰、  
大德風邁、其美雲從、事貴愈貶、禮峻彌恭、且有  
厚命、車服以庸、羽儀列辟、冠冕羣龍、周實多祐、  
漢有餘慶、奕奕皇族、於斯爲盛、公之綏之、終和  
且敬、是惟宗國、庶邦作詠、



太尉王儉碑

瞻旦爽而齊軫、軼夔龍而長驚、百辟翹首、譬列  
宿之仰望、舒千里結轍、若派流之宗江漢、及宋  
道盛運、鼎命將改、而瞻烏所集、未知適歸、公高  
臥閑宇、獨咤虛室、眷龍顏以託夢、詠日角以興  
言、停傳巖之下、懷滋水之上、慨深版蕩、念在濡  
足、霸君亦慮屬一匡、情隆三顧、卜匪熊羆、唯人  
是與、公深覩興廢、妙識人英、察榮光於河渚、攀  
龍翼於雲漢、傾方寸以奉國、忘七尺以事君、殊



文其會、異軫同歸、堆案盈几、克庭滿室、隨方引  
應、斷決如流、辭不輟響、紙無停筆、精明外朗、神  
彩傍映、矚矚接其光景、風雲溢乎帷席、囂喧總  
至、大薄相填、齊鑣共軫、並而不雜、銘曰、

悵公赫矣、世載經綸、四彼三傑、六茲五臣、德參  
世命、道亞如仁、屣步金門、濯纓蘭疇、激水上征、  
培風鬱起、

比邱尼僧敬法師碑

立言道往、標情妙覺、置想依空、練心成學、緼日



太尉王儉碑

瞻旦爽而齊軫、軼夔龍而長鶩、百辟翹首、譬列  
宿之仰望、舒千里結轍、若派流之宗江漢、及宋  
道盛運、鼎命將改、而瞻烏所集、未知適歸、公高  
臥閑宇、獨咤虛室、眷龍顏以託夢、詠日角以興  
言、停傳巖之下、懷滋水之上、慨深版蕩、念在濡  
足、霸君亦慮屬一匡、情隆三顧、卜匪熊羆、唯人  
是與、公深覩興廢、妙識人英、察榮光於河渚、攀  
龍翼於雲漢、傾方寸以奉國、忘七尺以事君、殊



文其會、異軫同歸、堆案盈几、克庭滿室、隨方引  
應、斷決如流、辭不輟響、紙無停筆、精明外朗、神  
彩傍映、曬矚接其光景、風雲溢乎帷席、囂喧總  
至、大薄相填、齊鑣共軫、並而不雜、銘曰、  
悵公赫矣、世載經綸、四彼三傑、六茲五臣、德參  
世命、道亞如仁、屣步金門、濯纓蘭疇、激水上征、  
培風鬱起、

比邱尼僧敬法師碑

立言道往、標情妙覺、置想依空、練心成學、緼日



悠長疏年緬邈風遷電改斯理莫違神有殊適  
形無異歸臨泉結慟有愴徂暉松飈轉蓋山雨  
披衣載刊貞軌永播餘徽







哀策文

齊明帝哀策文

龍鼓旣撤，備物已陳。殯宮無夜，夕燎終晨。號環  
輶幄，攀標應路。容衛弗改，軒檻如故。望東川而  
不追，仰昊天而自訴。列聖同軌，謚法樹聲。爰詔  
掌牘，式播遺英。其辭曰：

五曜在天，遞作民主。赫矣帝高，蒸哉嗣武。多難  
固業，殷憂啓聖。時惟我皇，功符受命。爰始濡足，  
坐運機深。鵬逝風舉，龍動雲陰。之郢南泝，御豫



西臨體茲大德懷此小心賓於四門四門穆穆  
納於百揆百揆肅肅德浸重荼仁被比屋何遠  
何邇無思不服嗣君喪道不式典謨神器業業  
事等瞻烏民懷與主后來其蘇皇天眷命授以  
籙圖臨朝凝睟昧旦丕顯斟酌前王擇其令典  
不言斯應不行斯踐路臺靡營離宮弗宴眷言  
膠塾弘啓上庠軌儀四代祖述三王德暉內動  
英華外揚禮行罇俎義及幽荒仰庠天德降年  
永久北極齊光南山獻壽滄溟奄竭嵩岱皆朽



沴非昊窮惟余之咎攀龍詎幾犬隧立立厭世  
崇陛卽宮下泉殯階已遽素幕高褰端闈洞啓  
蜃紉徐前背朱闕以南轉乘翠龍而東度經原  
野之荒涼屬西成之云暮伐金鼓以清道揚悲  
笳而啓路極厚地而不追終蒼天而永慕蒼梧  
晦遠春徽不泯紀事寂寞龜書可循哲王違世  
克播遺塵猗歟萬古暉光日新



沈隱侯集

卷二



諡議

齊武帝諡議

臣聞天德平分而四時之名或異聖功一揆而  
皇王之稱不同蓋跡因事隨名由義立堯臣禹  
佐咸率茲典伏惟盡寂窮微含神獨照德茂始  
裳之主道冠初邦之君含精靈於五緯駕貞明  
於三象初九勿用英氣凌雲負揭日月仰揚霄  
漢龍姿鳳采煥若麗天登庸在試盛績雲舉雖  
屈景潢汗降情尺木而拯世濟民浚發懷抱昔



成湯百家仁被比屋文王十里化先寡妻前聖  
後賢重規沓矩震雄圖於九江播靈威於夏洎  
旌旆未麾鯨鯢自殞弗勞羗棘之長無待六事  
之人義等伐謀功高善陳建有國之符成定鼎  
之業會朝清明事資於牧野受命作周非止於  
西伯視瞻寢門孝德光備守噐宗祧元良載遠  
嗣大寶以君百辟敷景化以致隆平守在四夷  
威行海內囹圄寂寞禮讓交興八柄馭下九官  
咸事臨朝凝默尊嚴若神風行日烜無思不暢



至仁與造化爭流，靈威與雷霆齊軌，上貫蒼昊，  
下洞深泉，春無淒風，夏無苦雨，時若罔愆，多稔  
如積，三革不累，五刃不砥，庠塾大啓，儒雅雲集，  
訓閱得宜，蒐狩有序，丹雘青邱之野，跂踵反舌  
之民，浮深駕阻，迴首革面，北夷畏力，獻琛內款，  
不藉終軍之使，無假絕漠之威，嘉祥霧合，秘瑞  
泉涌，史不輟文，簡無虛日，方當垂七曜之旗，駕  
八龍之乘，望禮中嶽，肆覲羣后，造化不仁，穆卜  
愆應，慕切遺弓，哀同遏密，晦朔不居，殯宮將啓。



勒茲大名宜盡徽極

齊明帝謚議

臣聞君德靡二辟王之名不一聖功無爽堯禹  
之稱或殊兼以拯世甯亂致平未必同道崇墀  
增祧嘉號不可相襲伏惟自天誕睿英聖在躬  
皇矣之符夙著蒸哉之謠早集賓門納揆天平  
地成自南自北無思不韙在屬負圖道揚末命  
值嗣主狂凶人倫道盡宗社阡危瞻烏靡託國  
難立長亂極治刑四海樂推三靈以眷東向而



讓天下功高代入流涕而膺寶位如就重負日  
旻劬勞躬親庶事撫宰納隍之念義同於罪已  
振民厚下之情無廢於終食聰明神武逖聽邇  
聞萬目備張絃綱靡漏御轡不迷甯藉聽於襄  
野大川可濟不待備於舟楫崢嶸之下澤靡不  
懷寥廓之上明無不燭包以宇宙潤以風雨霜  
露所交人跡所至百姓仰之而不知其始萬物  
用之而罔識其終上庠廢業忽焉已久三載弗  
爲淪弛將及臨朝引領思隆雅訓貴遊胥萃俊



造成羣方將驅世反本旣仁且壽告成東嶽高  
宴汾陽造化不仁厭世云及放助之慕不追負  
鄉之思空遠殯宮將撤輶軫難留英聲茂實於  
是乎在

梁德皇后諡議

表號垂名義昭不朽先皇后應祥月德比載坤  
靈柔範陰化儀形自遠覩天作合義先造舟而  
神猷夙掩所隔升運宜式遵景行用昭大典謹  
按諡法忠和純備曰德貴而好禮曰德宜崇曰



德皇后

仇隱侯集

卷二

論議

三



沈氏集

卷二

三十三



墓誌銘

齊太尉文憲王公墓銘

德被九官、功苞十亂、帝圖必舉、皇猷諧煥、斯謂  
國楨、是惟民幹、翱翔禮園、優游文館、秘義煙涵、  
瓊辭雨散、揆路揚輝、台庭改觀、方翊隆平、變茲  
天綱、福履每愆、降年多爽、微言永謝、庶僚誰長、  
鏡吹罷音、松風代響、

齊太尉徐公墓誌

公美風儀、善言笑、愛重琴碁、流連泉石、拓宇東



郊、暖然閑素、榮貴之來、無槩懷抱、任居端揆、萬  
務同歸、簿領盈前、囂塵滿席、直舉枉錯、虛來實  
反、天道不仁、與善褻應、

丞相長沙宣武王墓銘

山岳鎮地、日月麗天、鄰幾者庶、亞極稱賢、戔戔  
哲人、寔惟天縱、德基內美、功成日用、亦旣東轅、  
實拯朝難、迅鋒雷駭、霜戈電斷、震主必危、功高  
不賞、哀動上霄、痛銘玄壤、聖武爰發、後恥申冤、  
大禮空備、幽駕莫援、



司徒謝朓墓銘

嶽神昔降、和氣今鍾、以彼天爵、鬱爲人龍、崇基  
往峻、世德今重、漢車作傳、靈位攸待、我君應符、  
非公莫宰、華袞旣襲、輕蘿自改、形雖廟堂、心猶  
江海、經邦已備、皇情迴屬、素紉輟御、玄雲罷曲、  
尚書右僕射范雲墓銘

合契興王、匪勞物色、乘風鬱起、化成龍翼、乃作  
喉腎、帝猷必舉、乃作銓衡、彝倫有序、北京岨峻、  
東川迴薄、蘊吾名臣、終天靡作、



太常卿任昉墓銘

天才俊逸、文雅弘備、心爲學府、辭同錦肆、含華  
振藻、鬱焉高致、川谿望歸、巖阿待闕、幽光忽斷、  
窮燈黯滅、爾有令問、蘭薰無絕、



行狀

齊司空柳世隆行狀

公稟靈華嶽、幼挺珪璋、清襟素履、發乎齟舂、及  
長風質洞遠、儀止祥華、動容合矩、吐言被律、時  
沈攸之狼據陝西、氣陵物上、而太祖登庸作宰、  
天厯在躬、攸之播封豕之情、總全荆之力、兕甲  
十萬、鐵馬千羣、水陸長驚、志窺皇邑、公抗威川  
矣、勇畧紛紜、顯晦有方、出沒無緒、攸之乃反旆  
亘圍、親受矢石、增櫓乘埤、嚴衝駕雉、雲朝俯闕、



地穴斜通半藏晚食負戶晨汲公乃綏眾以武  
應敵以奇靈鋒電曜威策雲舉事切三版之危  
氣損九天之就殘寇外老逆黨內摧焚舟委甲  
掬指宵遯公風標秀徹器範弘潤茂乎辭彩雅  
善鼓琴摘純蔡之高芬纂鍾稽之妙曲雖嬰拂  
世務而素業無改臨姑蘇而想八桂登衡山而  
望九疑七紆邦組三臨蕩甸五職瑞扇一司百  
揆固可以齊衡八凱方駕五臣

齊臨川王行狀



公逵立源於陵壑、稟黃中之正氣、其性逸、其神  
凝、端華表美、弱齒弘貴、著乎將立、雲虛景暖、岳  
秀川渟、蘭桂不踰其質、珪璋未究其美、幼而悅  
學業、茂從師、洽貫書場、該綜文圃、清暉秘譽、燭  
野光朝、

齊禪林寺尼淨秀行狀

比丘尼釋淨秀、本姓梁氏、安定烏氏人也、其先  
出自少昊、至伯翳佐禹治水、賜姓嬴氏、周孝王  
時、封其十六世孫非子於秦、其曾孫秦仲爲宣



王侯伯，平王東遷，封秦仲少子於梁，是爲梁伯。  
漢景帝世，梁林爲太原太守，徙居北地烏氏，遂  
爲郡人焉。自時厥後，昌胤阜世，名德交暉，蟬冕  
疊映。漢元嘉元年，梁景爲尚書令，少習韓詩，爲  
世通儒。魏時，梁爽爲司徒左長史、秘書監，博極  
羣書，善談立理。晉太始中，梁闡爲涼、雍二州刺  
史，卽尼之廼祖也。闡孫撫，晉范陽王虓驃騎參  
軍事、漁陽太守，遭永嘉蕩析，淪於僞趙，爲秘書  
監、征南長史，後得還晉，爲散騎侍郎。子疇，字道



度、征虜司馬子粲之仕宋征虜府參軍事封龍川縣都亭侯、尼卽都亭侯之第四女也、挺慧悟於曠劫、體妙解於當年、而性調和、綽不與凡孩孺同數、弱齡便神情峻徹、非常童稚之伍、行仁尚道、洗志法門、至年十歲、慈念彌篤、絕粉黛之容、棄錦綺之翫、誦經行道、長齋蔬食、年十二便求出家、家人苦相禁抑、皆莫之許、於是心祈冥感、專精一念、乃屢獲昭祥、亟降瑞相、第四叔超獨爲先覺、開譬內外、故雅操獲遂、上天性聰獻



幼而超羣、年至七歲、自然持齋、家中請僧行道、  
聞讀大涅槃經、不聽食肉、於是卽長蔬不噉、二  
親覺知、若得魚肉、輒便棄去、昔有外國嘗練道  
人、出於京師、往來梁合、便受五戒、勤翹奉持、未  
嘗違犯、日夜恒以禮拜讀誦爲業、更無餘務、及  
手能書、常自寫經、所有財物、唯克功德之用、不  
營俗好、少欲、入道、父母爲障、遂推流、歲月至年  
二十九、方獲所志、落髮青園、服膺寺主、上事師  
虔孝、先意承旨、盡身竭力、猶懼弗及、躬修三業、



夙夜匪懈，僧使衆役，每居其首，精進劬勤，觸事  
關涉，有開土馬先生者，於青園見上，卽便記云，  
此尼當生兜率天也，又親於佛殿內坐禪，同集  
三人，忽聞空中有聲，狀如牛吼，二尼驚怖，迷悶  
戰慄，上惔然自若，徐起下牀，歸房執燭，檢聲所  
在，旋至杓欄，二尼便聞殿上有人相語云，各自  
避路，某甲師還後，又於禪房中坐，伴類數人，二  
尼鼾眠，此尼於睡中見有一人，頭屈於屋，語云，  
勿驚某甲師也，此尼於是不敢復坐，又以一時



坐禪同伴一尼有小緣事暫欲下牀見有一人  
抵掌止之曰莫撓某甲師於是閉氣徐出歎未  
曾有如此之事比類甚繁既不卽記悉多漏忘  
不得具載性愛戒律進止俯仰必欲遵承於是  
現請瞿律師講內自思惟但有直一千心中  
慮事不辦夜卽夢見鴟鵂鵠鵲雀子各乘車車  
並安軒車之大小還稱可鳥形同聲唱言我助  
某甲尼講去旣寤歡喜知事當成及至就講乃  
得七十檀越設供果食皆精後復又請顗律師



開律卽發講日清淨罍水自然香如水園香氣  
深以爲欣旣而坐禪得定至夜中方起更無餘  
伴便自念言將不犯獨卽諮律師律師答云無  
所犯也意中猶豫恐違失且見諸寺尼僧多有  
不如法乃喟然歎曰嗚呼鴻徽未遠靈緒稍隕  
自非引咎責躬豈能導物卽自懺悔行摩那睡  
於是京師二部莫不咨嗟云如斯之人律行明  
白規矩應法尚爾思愆何況我等動靜多過而  
不慚愧者哉遂相率普懺無有子遺又於南園



就穎律師受戒，卽受戒日，淨鬘水香，還復如前。  
青園諸尼，及以餘寺，無不更受戒者。律師於是  
亦次第請寺敷弘戒品，闡揚大教，故憲軌遐流。  
迄屆於今，穎律師又令上約語諸寺尼，有高牀  
俗服者，一切改易，上奉旨制，勒無不祇承。律藏  
之興，自茲更始。後又就三藏法師受戒，清淨水  
香，復如前不異。青園徒眾，旣廣，所見不同。師已  
遷青，更無覲侍。於是思別立住處，可得外嚴聖  
則，內窮宴默者。以宋大明七年八月，故黃脩儀



及南昌公主深崇三寶，敬仰德行。初置精舍，上麻衣，弗溫，藿食，忘饑，躬執泥瓦，盡勤夙夜。以宋泰始三年，明帝賜號曰禪林。蓋性好閑靜，冥感有徵矣。而制龕造像，無不畢備。又寫集衆經，皆令具足，裝潢，染成，悉自然有。娑羅伽龍王兄弟二人，現迹彌日，不滅。知識往來，並親瞻覩，招納同住，十有餘人。訓化獎率，皆令禪誦。每至奉請聖僧，菓食之上，必有異迹。又於一時，虔請聖衆，七日供養，禮懺，始訖，攝心運想，卽見兩外國道。



人舉手其語一云呿羅一云毗呿羅所著袈裟色如桑椹之熟因卽取泥以壞衣色如所見倣於是遠近尼僧並相倣效改服間色故得絕於五大之過道俗有分者也此後又請河耨達池五百羅漢日日凡聖無遮大會已近二旬俱設旣豐復更請罽賓國五百羅漢足上爲千及請凡僧還如前法始過一日見有一外國道人衆僧悉皆不識於是試相借問自云從罽賓國來又問來此幾時答云來此一年也衆僧覺異令



人守門觀其動靜而食畢乃於宋林門出使人  
逐視見從宋林門去行十餘步奄便失之又嘗  
請聖僧浴器盛香湯及以雜物因而禮拜內外  
寂默卽聞器稀杓作聲如用水法意謂或是有  
人出便共往看但見水杓自然搖動故知神異  
又曾夜中忽見滿屋光明正言已曉自起開戶  
見外猶闇卽更閉戶還牀復寢久久方乃明也  
又經違和極篤忽自見大光明遍於世界山河  
樹木浩然無礙欣爾獨笑傍人怪問其陳所見



卽能起行禮拜讀誦如常無異又於一時復違和亦甚危困忽舉兩手狀如捧物語傍人不解問言爲何所捧答云見寶塔從地出意欲接之幡花伎樂無非所有於是疾恙豁然而除都無復患又復違和數日中亦殊綿悞恒多東向視合掌向空於一時中急索香火移時合掌卽自說云見彌勒佛及與舍利佛目連等諸聖人亦自見諸弟子數甚無量滿虛空中須臾彌勒下生起頭末城云有人持幡華伎樂及三臺來迎



於此上幡華伎樂非世間比半天而住一臺已  
在半路一臺未至半路一臺未見但聞有而已  
爾時已作兩臺爲此兆故卽更作一臺也又云  
有兩樹寶華在邊人來近牀語莫壞我華自此  
之後病卽除損前後遇疾恒有瑞相或得涼風  
或得妙藥或聞異香病便卽愈疾瘥之爲理都  
以漸豁然而去如此其數不能備記又天監三  
年一夏違和於晝日眠中見虛空藏菩薩卽自  
圍繞誦唄唄聲徹外眠覺所患卽除又白日臥



開眼見佛入房旛蓋滿屋語傍人令燒香了自  
不見上以天監五年六月十七日得病苦心悶  
不下飲彭城寺令法師以六月十九日夜得夢  
見一處謂是兜率天上住止嚴麗非世間比言  
此是上住處卽見上在中於是法師有語上上  
得生好處當見將接上是法師小品檀越勿見  
遺棄上卽答云法師丈夫又弘通經教自應居  
勝地某甲是女人何能益法師又云不如此也  
雖爲丈夫不能精進持戒不及上時體已轉惡



與令法師素疎不堪相見病旣稍增飲粥日少  
爲治無益漸就綿惓至七月十二日爾時天雨  
清涼悶勢如小退自云夢見迎來至佛殿西頭  
人人捉旛竿猶車在地旛之爲理不異世間隊  
擔鼓旗旛也至二十日便絕不復進飲粥至二  
十二日令請相識衆僧設會意似分別至二十  
五日云見十方諸佛遍滿空中至二十七日中  
後泯然而臥作兩炊久方復動轉自云上堯率  
天見彌勒及諸菩薩皆黃金色上手中自有一



琉璃清淨鬘可高三尺許以上彌勒卽放光明  
照于上身至兜率天亦不見飲食自然飽滿故  
不復須人間食也但聞人間食皆臭是以不肯  
食於彼天上得波利麤將還意欲與令法師有  
人問何意將麤去答云欲與令法師是人言令  
法師是人中果報那得食天上食不聽將去旣  
而欲見令法師間居上爲迎法師來相見語法  
師可作好菜食以餉山中坐禪道人若修三業  
方得生兜率天耳法師不坐禪所以令作食餉



山上道人者欲使與坐禪人作因緣也自八八月體中亦轉惡不復說餘事但云有三十二童子一名功德天二名善女天是迦毗羅所領恒來在左右與我驅使或言得人餉飲食令眾中行之復云空中晝夜作伎樂聞人耳也



沈隱侯集

卷二

三



文

懺悔文

弟子沈約稽首上白諸佛眾聖，約自今生已前，  
至於無始，罪業參差，固非詞象所美，識昧往緣，  
莫由證舉。爰始成童，有心嗜慾，不識慈悲，莫辨  
罪報，以爲毛羣飢品，事允庖厨，無對之緣，非惻  
隱所及。晨剉暮爇，亘月隨年，嗛腹填虛，非斯莫  
可。兼曩昔蒙稚，精靈靡達，遨戲之間，恣行天暴，  
蠢動飛沈，罔非登俎。儻想逢值，橫加剿撲，却數



追念種彙寔蕃遠憶想間難或詳盡又暑月寢  
臥蚊蚋嗜膚忿之于心應之于手歲所殲殞略  
盈萬計手因怒運命因手傾爲殺之道事無不  
足迄至于今猶未頓免又嘗竭水而漁躬事網  
罟牽驅士卒懽娛賞會若斯等輩眾夥非一黨  
隸賓遊愆青交互或盜人園實或偷人芻豢弱  
性蒙心隨喜讚悅受分吞臠皎然不昧性愛墳  
典苟得忘廉取非其有卷將二百又綺語者眾  
源條繁廣假妄之愆雖免大過微觸細犯亦難



備陳又追尋少年血氣方壯習累所纏事難排  
豁淇水上宮誠無云幾分桃斷袖亦足稱多此  
實生死牢穽未易洗拔灌志慘舒性所同稟遷  
怒過嗔有時或然厲色嚴聲無日可免又言謔  
行止曾不尋研觸過斯發動淪無紀終朝紛擾  
薄暮不休來果昏頑將由此作前念甫謝後念  
復興尺波不息寸陰驟往愧悔攢心罔知云厝  
今於十方三世諸佛前見在衆僧大衆前誓心  
尅已追自悔責收遜前愆洗濯今慮校身諸失



歸命天尊，又尋七尺所本，八微是構，折而離之，  
莫知其主，雖造業者身，身隨念滅，而念念相生，  
離續無已，往所行惡，造既由心，行惡之時，其心  
既染，既染之心，雖與念滅，往之所染，卽成後緣，  
若不本諸真諦，以空滅有，則染心之累，不卒可  
磨。今者興此愧悔，磨昔所染，所染得除，卽空成  
性，其性既空，庶罪無所託，布髮頂禮，幽顯證成，  
此念一成，相續不斷，日磨歲瑩，生生不休，迄至  
道場，無復退轉，又彼惡加我，皆由我昔加人，若



不滅此重緣則來惡彌遘當今斷絕永息來緣  
道無不在有來斯應庶達今誠要之咸達

千僧會願文

弟子沈約上白十方諸佛十方諸大聖今日見  
前衆僧三界非有五陰皆無四倒十纏共相和  
合一切如電揮萬劫於俄頃邱井易淪終漂沈  
於苦岸迷塗邃遠弱喪忘歸區區七尺莫知其  
假耳目之外謂爲空談靡依靡歸不信不受生  
靈一謝再得無期約所以撫心自惻臨踐非譬



者也至聖凝寂無迹可尋緣應所感事惟拯物  
持鉢安行出彼祇樹不逾停午以福衆生芳塵  
餘法峩然未改約以往夏邁羅痾疾帝上哀矜  
深垂愍慮以月次徂暑日在丙寅仰會千僧於  
其私宅隆茲重施弗知所限旣已奉祇洪德又  
思自罄家財一舉盈千力難私辦稍而後滿事  
或易克草堂約法師於所住山寺爲營八集其  
一仰憑上定林寺祐法王今月二十九日第十  
會集百僧於所創田廬福不吝捐聞之涇川心



路皎然，又過於此。凡有涓毫應證，來業無巨無  
細，咸歸聖主，仰願十方共明此誓，豈足少酬天  
眷。蓋以微寄誠心云爾。

### 賽蔣山廟文

我皇體天御宇，望日表尊，備樂變乎笙鏞，鬱禮  
華於俎豆，邇無不懷，遠無不肅。鳥革立素之容，  
草移丹綠之狀，泉露改味，日月重光。仰惟大王  
年踰二百世，兼四代，揚玉桴，布瑤席，秦梁楚趙  
之巫，把瓊茅而延佇；燕衛宋鄭之音，結流風而



成曲九嶷之乘蔽日三山之駕若雲

冠子祝文

蠲茲今日元服肇加成德既舉童心自化行之  
則至無謂道賒敦以秋實食以春華無恥下問  
乃致高車子孫千億廣樹厥家



樂府

梁雅樂歌

十一首

皇雅 二曲

皇帝出入宋孝建起居注奏永至至是  
改爲皇雅取詩皇矣上帝臨下有赫也

帝德實廣運車書靡不賓執珪朝群后垂旒御  
百神八荒重譯至萬國婉來親

其二

華蓋拂紫微勾陳繞大一容裔被緹組參差羅



罕畢星回昭以爛天行徐且謚

其三

清蹕朝萬寓端冕臨正陽青絢黃金纓袞衣文  
繡裳既散華蟲采復流日月光

滌雅一曲

牲出入宋元徽儀注奏引牲至是改  
爲滌雅取禮記帝牛必在滌三月也

將脩盛禮其儀孔熾有膺斯牲國門是置不黎  
不瘠靡愆靡忌呈肌獻體永言昭事俯休皇德  
仰綏靈志百福具膺嘉祥允洎駿奔伊在慶覃



遐嗣

牲雅 一曲

薦毛血、宋元徽儀注奏嘉薦。至是改爲牲雅。取春秋左氏傳牲牷肥腍也。

反本興敬、復古昭誠、禮容宿設、祀事孔明、華俎待獻、崇碑麗牲、克哉繭握、肅矣簪纓、其膋旣啓、我豆旣盈、庖丁游刃、葛盧驗聲、多祉攸集、景福來并、

誠雅 三曲

降神及迎送、宋元徽儀注奏昭夏。至是改爲誠雅。取尚書至誠感神也。



懷忽慌，瞻浩蕩，盡誠潔，致虔想，出杳冥，降無象，  
皇情肅，具僚仰，人禮盛，神途敞，僎明靈，申敬享，  
感蒼極，洞玄象，降神

地德溥，崑邱峻，揚羽翟，鼓應輦，出尊祇，展誠信，  
招海瀆，羅嶽鎮，惟福祉，咸昭晉，迎神

我有明德，馨非稷黍，牲玉孔備，嘉薦惟旅，金懸  
宿設，和樂具舉，禮達幽明，敬行尊俎，鐘鼓云送，  
遐福是與，送神

獻雅 一曲



皇帝飲福酒。宋元徽儀注奏嘉祚。梁初改爲永祚。至是改爲獻雅。取禮記祭統尸飲五。洗玉爵獻卿。今之福酒亦古獻之義也。

神宮肅肅天儀穆穆禮獻既同膺茲釐福我有  
馨明無愧史祝

禋雅 二曲

就燎位。宋元徽儀注奏昭遠。就埋位。齊永明儀注奏隸幽。至是燎埋俱奏禋雅。取周禮大宗伯以禋祀祀昊天上帝也。

紫宮昭煥太乙微立降臨下土尊高上天載陳  
珪幣式備牲牷雲瓠清引栒虞高懸俯昭象物



仰致高煙，肅彼靈祉，咸達皇虔。

就燎用

盛樂斯舉，協徵調宮，靈饗慶洽，祉積化融，八變有序，三獻已終，坎牲瘞玉，酌德報功，振垂成呂，投壤生風，道無虛致，事由感通，於皇盛烈，比祚華嵩。

就埋用

梁南郊登歌詩二首

瞰旣明，禮告成，惟聖祖，主上靈，爵已獻，罍又盈，息羽籥，展歌聲，僊如在，結皇情。

禮容盛，尊俎列，立酒陳，陶匏設，獻清酒，致虔潔。



王旣升，樂已闋，降蒼昊垂芳烈。

梁北郊登歌二首

方壇旣埴，地祇已出，盛典弗訾，群望咸秩，乃升  
乃獻，敬成禮卒，靈降無兆，神饗載謐，允矣嘉祚，  
其升如日。

至哉坤元，實惟厚載，躬茲奠饗，誠交顯晦，或升  
或降，搖珠動珮，德表成物，慶流皇代，純嘏不訾，  
祺福是賚。

梁明堂登歌五首



青帝

帝居在震，龍德司春，開元布澤，舍和尚仁，群居  
既散，歲云陽止，飭農分地，民粒惟始，雕梁繡棋，  
丹楹玉墀，靈威以降，百福來綏。

赤帝

炎光在離，火爲威德，執禮昭訓，持衡受則，靡草  
旣凋，溫風以至，嘉薦惟旅，時羞孔備，齊緹在堂，  
笙鏞在下，匪惟七百，無絕終始。

黃帝



鬱彼中壇含靈闡化迴環氣象輪無輟駕布德  
焉在四序將收音宮數五飯稷驂駟宅屏居中  
旁臨外宇升爲帝尊降爲神主

白帝

神在秋方帝居西皓允茲金德裁成萬寶鴻來  
雀化參見火斜幕無玄鳥菊有黃華載列笙磬  
式陳彝俎靈罔常懷惟德是與

黑帝

德盛乎水玄冥紀節陰降陽騰氣凝象閔

隋書  
作閉



司智蒞坎，駕鐵衣玄，祈寒折地，晷度迴天，悠悠四海，駿奔奉職，祚我無疆，永隆民極。

梁宗廟登歌七首

功高禮洽，德尊樂備，三獻具舉，百司在位，誠敬罔讐，幽明同致，茫茫億兆，無思不遂，蓋之如天，容之如地。

殷兆玉筐，周始邠王，於赫文祖，基我大梁，肇土七十，奄有四方，帝軒百祀，人思未忘，永言聖烈，祚我無疆。



有夏多罪，殷人塗炭。四海倒懸，十室思亂。自天  
命我，殲凶殄難。旣躍乃飛，言登天漢。爰享爰格，  
福祿攸贊。

犧象旣飾，鬯俎斯具。我鬱載馨，黃流乃注。戕戕  
卿士，駿奔是務。佩上鳴堦，纓還拂樹。悠悠億兆，  
天臨日煦。

猗與至德，光被黔首。鑄鎔蒼昊，甄陶區有。恪恭  
三獻，對揚萬壽。比屋可封，含生無咎。匪徒七百，  
天長地久。



有命自天，於皇后帝。悠悠四海，莫不來祭。繁祉具膺，八神聳衛。福至有兆，慶來無際。播此餘休，于彼荒裔。

祀典昭潔，我禮莫違。八簋充室，六龍解駢。神宮肅肅，靈寢微微。嘉薦既饗，景福攸歸。至德光被，洪祚載輝。

### 梁三朝雅樂歌六首

梁初郊禋宗廟及三朝之樂並用宋齊儀注唯改嘉祚爲永祚又去永至之樂及帝定國並以雅爲稱取詩序云言天下之事形四方之風謂之雅雅者正也



止於十二，則天數也。乃去階步之樂，增徹食之雅焉。詞並沈約所製。

俊雅 一曲

衆官出入，宋元徽儀注奏肅咸樂。至是改爲俊雅。取禮記司徒論選士之序者，升之學曰俊士也。

設官分職，髦俊攸俟。髦俊伊何，貴德尚齒。唐虞咸事，周甯多士。區區衛國，猶賴君子。漢之得人，帝猷乃理。

開我八襲，闢我九重。珎珎流響，纓紱有容。袞衣前邁，列辟雲從。義兼東序，事美西雍。分階等肅。



異列齊恭。

重列北上。分庭異陛。百司揚職。九賓相禮。齊宋  
舅甥。魯衛兄弟。思皇藹藹。羣龍濟濟。我有嘉賓。  
實惟愷悌。

胤雅 一曲

皇太子出入奏胤雅。取詩  
君子萬年。永錫祚胤也。

自西殷代。哲王迭有。降及周成。惟器是守。上天  
乃眷。大梁既受。灼灼重明。仰承元首。體乾作貳。  
命服斯九。置保置而。吾前吾後。前星北耀。克隆



萬壽

寅雅 一曲

王公出入奏寅雅。取尚書周官三公弘化。寅亮天地也。

禮莫違，樂具舉，延藩辟，朝帝所，執桓蒲，列齊莒，垂袞毳，紛容與，升有儀，降有序，齊簪紱，忘笑語，始矜嚴，終酣醕。

介雅 三曲

上壽酒奏介雅。取詩君子萬年介爾景福也。

百福四象初，萬壽三元始，拜獻惟袞職，同心協。



卿士北極永無窮，南山何足擬。

壽隨百禮洽，慶與三朝升。惟皇集繁祉，景福互相仍。申錫永無遺，穰簡必來應。

百味既含馨，六飲莫能尚。玉壘信湛湛，金卮頗搖漾。敬舉癸天和，祥祉流嘉貺。

需雅

八曲

食舉奏需雅，取易曰雲上於天，需。君子以飲食燕樂也。

實體平心待和味，庶羞百品多爲貴。或鼎或鼐，宣九沸。楚桂胡鹽芼芳卉，加籩列俎醢且蔚。



五味九變兼六和，令芳甘旨庶且多。三危之露

九期

一作貞

禾圓案方丈粲星羅，皇舉斯樂同山

河

九州上腴非一族，玄芝碧樹壽華木。終期采之  
不盈掬，用拂腥膻和九穀。旣甘且飫，致遐福  
人欲所大味爲先，興和盡敬咸在旃。碧鱗朱尾  
獻嘉鮮，紅毛綠翼墜輕翮。臣拜稽首萬斯年，  
擊鐘以俟惟大國。况乃御天流至德，侑食斯舉  
揚盛則其禮不訾，儀不忒。風猷所被深且塞，



膳夫奉職獻芳滋，不麝不天，咸以時調，甘適苦  
別澠淄，其德不爽，受福釐於焉逸豫，永無期  
備味斯饗，惟至聖咸降，人神禮爲盛，或風或雅  
流歌詠，負鼎言歸，啟殷命，悠悠四海同茲慶  
道我六穗羅八珍，洪鼎自爨，匪勞薪，荆包海物  
必來陳，滑甘滫瀡，味和神，以斯至德被無垠。

雍雅 三曲

徹饌奏雍雅，取禮記  
大饗客出以雍徹也。

明明在上，其儀有序，終事靡訐，收錫散俎，乃升



乃降和樂備舉天德莫違人謀是與敬行禮達  
茲焉讌語

我餽維阜我肴孔庶嘉味既克食旨斯飫屬饜  
無爽冲和在御擊壤齊歡懷生等豫烝庶乃粒  
實由仁恕

百司警列皇在在陛旣飫且醕卒食成禮其容  
穆穆其儀濟濟凡百庶寮莫不愷悌奄有萬國  
抑由天啟

五引曲五首



角引

萌生觸法歲在春，咸池始奏德尚仁。  
愔懣以息和且均。

徵引

執衡司事宅離方，滔滔夏日火德昌。  
八音備舉樂無疆。

宮引

八音資始君五聲，興比和樂感百精。  
優游律呂被咸英。



商引

司秋紀兌奏西音、激揚鐘石和瑟琴、風流福被  
樂愔愔、

羽引

玄英紀運冬冰拆。

一作圻

物爲音本和且悅。窮高

測深長無絕。

### 梁鼓吹曲十二首

鼓吹宋齊並用漢曲、又克庭用十六曲  
梁祖乃去四曲。留其十二。合日時也。更  
制新歌以述功德。

沈隱侯集

卷二

樂府

五



木紀謝

漢朱鷺改爲木紀謝言齊謝梁升也。

木紀謝火運昌炳南陸耀炎光民去癸鼎歸梁  
鯨魚出慶雲翔轡五帝軼三王德無外化溥將  
仁蕩蕩義湯湯浸金石達昊蒼橫四海被八  
舞千戚垂衣裳對天眷坐巖廊脣有錫祚無疆  
風教遠禮容盛感人神宣舞詠降繁祉延嘉慶

賢首山

漢思悲翁改爲賢首山言武帝破魏軍於司部肇王亦也。



賢首山險而峻，乘峴憑臨，胡陣騁奇謀，奮卒徒。  
斷白馬，塞飛狐，殪日逐，殲骨都，乃谷蠡，馘林胡。  
草旣潤，原亦塗，輪無反，幕有烏，掃殘孽，振戎逋。  
揚凱奏，展歡酺，詠杖杜，旋京吳。

### 桐柏山

漢艾如張，改爲桐柏山。言武帝牧司。王業彌章也。

桐栢山，淮之首，肇基帝迹，遂光區有，大震邊關。  
殪獯醜，農旣勸，民惟阜，穗克庭，稼盈畝，迨嘉辰。  
薦芳糗，納寒場，爲春酒，昭景福，介眉壽，天斯長。



地斯久化無極功不朽

道亡

漢上之回改爲道亡言東昏喪道義師起樊鄧也

道亡數極歸永元悠悠兆庶盡含冤沈河莫極  
皆無安赴海誰授矯龍翰自樊漢仙波流水清  
且瀾救此倒懸拯塗炭誓師劉旅赫靈斷率茲  
八百驅十亂登我聖明去多難長夜杳冥忽云  
旦

忱威

忱一作九



漢擁離改爲忱威言破加湖元勲建也。

忱威授律命蒼兕

一作光

言薄加湖灌秋水迴瀾

澌汨汎增雉爭河投岸掬盈指犯刃嬰戈洞流

矢資此威

一作盛

烈齊文軌

### 漢東流

漢戰城南改爲漢東流言義師克魯山城也。

漢東流江之汭逆徒蜂聚旌旗紛蔽仰震威靈

乘高騁銳至仁解網窮鳥入懷因此龍躍言登

泰階



鶴樓峻

漢巫山高改爲鶴樓峻。言平郢城，兵威無敵也。

鶴樓峻連翠微，因巖設險，池永歸，唇亡齒懼，薄言震耀靈威，凶衆稽顙，天不能違，金湯無所用，功烈長巍巍。

昏主恣淫慝

漢上陵改爲昏主恣淫慝。言東昏政亂，武帝起義平九江姑熟，大破朱雀，伐罪弔民也。

昏主恣淫慝，皆曰自昌盛，上仁矜億兆，誓師爲



請命旣齊丹浦戰又符甲子辰龕難伐有罪伐  
罪弔斯民悠悠億萬姓於此覩陽春

### 石首局

漢將進酒改爲石首局言義  
師平京城仍廢昏定大事也。

石首局比墉堦新堞嚴東壘峻共表裏遙相鎮  
矢未飛鼓方振競銜壁並輿櫬酒池擾象廊震  
同伐謀兼善陳闢應和掃煨燼翦庶惡靡餘屑

### 期運集

漢有所思改爲期運集言  
帝膺籙受禪德盛化遠也。

樂府



期運集、惟皇膺寶符、龍躍清漢渚、鳳起方城隅、  
謳歌共適夏、獄訟兩違朱、二儀啓嘉祚、千載猶  
旦暮、舞蹈流帝功、金玉昭玉度、

於穆

漢芳樹改爲於穆言大梁闡  
運君臣和樂休祚方遠也

於穆君臣、君臣和以肅、關王道、定天保、樂均靈  
囿、燕同在鎬、前庭懸鼓鐘、左右列笙鏞、纓佩俯  
仰有則脩、一作禮容、翔振鷺、騁羣龍、隆周何足

擬、遠與唐比蹤、



# 惟大梁

漢上邪，改爲惟大梁。言梁德廣，運仁化洽也。

惟大梁開運受籙膺圖君八極冠帶被五都四海並和會排闕欵塞無異塗

## 梁大壯大觀舞歌二首

梁初猶用凱容宣烈之舞武帝定樂以武舞爲大壯舞文舞爲大觀舞又大壯舞奏夷則大觀舞奏姑洗取其月望也

## 大壯舞歌

大壯舞取易象云大壯大者壯也正大而天地之情可見也



高高在上，實愛斯人。眷求聖德，大拯彝倫。率土  
方燎，如火在薪。懔懔黔首，暮不及晨。朱光啓耀，  
兆發窮旻。我皇鬱起，龍躍漢津。言屆牧野，電激  
雷震。闕鞏之甲，彭濮之人。或貔或武，漂杵浮輪。  
我邦雖舊，其命維新。六伐乃止，七德必陳。君臨  
萬國，遂撫八寅。

大觀舞歌

大觀者，取易象曰大觀在上，  
觀天之神道而四時不忒也。

皇矣帝烈，大哉興聖。奄有四方，受天明命。居士



不怠臨下惟敬舉無訾則動無失正物從其本  
人遂其性昭播九功肅齊八柄寬以惠下德以  
爲政三趾晨儀重輪夕映棧壑忘阻梯山匪復  
如日有恒與天無竟載陳金石式流舞詠咸英  
韶夏於茲比盛

梁鞞舞歌

明之君六首

明君本漢世鞞舞曲梁武帝時改其辭以歌君德。

大梁七百始天監三元初聖功澄宇縣帝德總



車書熙熙億兆臣其志皆懽愉

刑措甫自今隆平亦肇茲神武超楚漢安用道  
邠岐百拜奄來宅執玉咸在斯象天則地體無  
爲

禮緝民用擾樂諧風自移舜琴中已絕堯衣今  
復垂象天則地體無爲

治兵戰六獸爲邦命九官靈蛇及瑞羽分素復  
銜丹望就踰軒頊鏗鏘掩咸護九尾擾成羣八  
象鳴相顧象天則地化雲布



有爲臣所執司契君之道運行乃四時無言信  
蒼昊宸居體冲寂忘懷定天保  
至德同自然裁成侔立造珍祥委天貺靈物開  
地寶窈窕降青琴參差秀朱草

日出東南隅行

以下  
五言

朝日出邯鄲照我叢臺端中有傾城豔顧景織  
羅紈延軀似纖約遺視若回瀾瑤裝映層綺金  
服炫雕欒幸有同匡好西仕服秦官寶劒垂玉  
貝汗馬飾金鞍榮場類轉雪逸控寫騰鸞羅衣



夕解帶、玉釵暮垂冠

昭君辭

朝發披香殿、夕濟汾陰河、於茲懷九逝、自此斂  
雙蛾、沾妝疑湛露、繞臆狀流波、日見奔沙起、稍  
覺轉蓬多、胡風犯肌骨、非直傷綺羅、銜涕試南  
望、關山鬱嵯峨、始作陽春曲、終成苦寒歌、唯有  
三五夜、月明暫經過、

長歌行

連連舟壑改、微微市朝變、來功嗣往迹、莫武祖



升、疾、局、塗、頓、遠、策、留、懽、恨、奔、箭、拊、成、狀、驚、鴻、  
休、擬、回、電、歲、去、芳、願、違、年、來、苦、心、薦、春、貌、既、移、  
紅、秋、林、豈、停、舊、一、倍、茂、陵、道、甯、思、栢、梁、宴、長、戢、  
兔、園、情、永、別、金、華、殿、聲、微、無、惑、簡、丹、青、有、餘、綯、  
幽、簫、且、未、調、無、使、長、歌、倦、

又

春、陽、黃、綠、柳、寒、堦、積、皓、雪、依、依、往、紀、盈、霏、霏、來、  
思、結、思、結、纏、歲、宴、曾、是、掩、初、節、初、節、曾、不、掩、浮、  
榮、逐、弦、缺、弦、缺、更、圓、合、浮、榮、永、沈、滅、色、隨、夏、蓮、



變態與秋霜，耄道迫無異期。賢愚有同絕，銜恨豈云忘。天道無甄別，功名識所職。竹帛尋摧裂，生外苟難尋。坐爲長歎設。

君子行

良御惑燕楚，妙察亂澠淄。隄傾由漏壤，垣隙自危基。囂途或妄踐，黨議勿輕持。

從軍行

惜哉征夫子，憂恨良獨多。浮天出鯁海，束馬渡交河。雪縈九折嶺，風卷萬里波。維舟無夕島，秣



騏、乏、平、莎、凌、濤、富、驚、沫、援、木、闕、垂、蘿、江、颶、鴻、疊、  
嶼、流、雲、照、層、阿、立、埃、晦、朔、馬、白、日、照、吳、戈、寢、興、  
動、征、怨、寤、寐、起、還、歌、晨、裝、豈、輟、警、夕、壘、詎、淹、和、  
苦、哉、遠、征、人、悲、矣、將、如、何、

豫章行

燕、陵、乎、而、遠、易、河、清、且、駛、一、見、塵、波、阻、臨、途、引、  
征、思、雙、劍、愛、匣、同、孤、鸞、悲、影、異、宴、言、誠、易、纂、清、  
歌、信、難、嗣、臥、聞、夕、鐘、急、坐、閱、朝、光、亟、往、歡、墜、壯、  
心、來、戚、滿、衰、志、徂、芳、無、再、馥、淪、灰、定、還、熾、夏、臺、



尚可忘榮辱，亦奚事愧微曠士節。徒感鄙生餌，  
勞哉納辰和。地遠託聲寄，

相逢狹路間

相逢洛陽道，繫聲流水車。路逢輕薄子，竝立問  
君家。君家誠易知，易知復易憶。龍馬滿街衢，飛  
蓋交門側。大子萬戶侯，中子飛而食。小子始從  
官，朝夕溫省直。三子俱入門，赫奕多羽翼。若若  
青組紆，煙煙金鐙色。大婦遶梁歌，中婦迴文織。  
小婦獨無事，閉門聊且卽。綠綺試一彈，玄鶴方



長安有狹斜行

青槐金陵陌，丹轂貴遊士。  
方驂萬乘臣，炫服千金子。  
咸陽不足稱，臨淄孰能擬。

三婦豔

大婦掃玉墀，中婦結羅帷。  
小婦獨無事，對鏡畫蛾眉。  
良人且安卧，夜長方自私。

江薜生幽渚

一作塘上行

澤蘭被荒徑，孤芳豈自通。  
幸逢瑤池曠，得與金



芝叢朝承紫臺露，夕潤綠池風。旣美脩嫿女，復  
悅繁華童。夙昔玉霜滿，旦暮翠條空。葉飄儲胥  
右，芳歇露寒東。紀化尚盈昃，俗志信殞隆。財殫  
交易絕，華落愛難終。所惜改驩眄，豈恨逐征蓬。  
願回昭陽景，持照長門宮。

却出東西門行

驅馬城西阿，遙眺想京闕。望極煙原盡，地遠山  
河沒。搖裝非短晨，還歌豈明發。脩服悵邊羈，瞻  
途眇鄉謁。馳蓋轉徂龍，回星引奔月。樂去哀境



悲來壯心歇、歲華委徂貌、年霜移暮髮、晨物  
久侵尋、征思坐淪越、清氛掩行夢、憂原盪瀛渤、  
一念起、關山千里顧邱窟、

飲馬長城窟

介馬度龍堆、塗縈馬屢迴、前訪昌海驛、雜種寇  
輪臺、旌幕卷煙雨、徒御犯冰埃、

青青河畔草

漠漠牀上塵、心中憶故人、故人不可憶、中夜長  
歎息、歎息想容儀、不言長別離、別離稍已久、空



牀寄杯酒

梁甫吟

龍駕有馳策、日御無停陰、星籥亟迴變、氣化坐  
盈侵、寒光稍眇眇、秋塞一作日沈沈、高窓仄餘

火、火大火心星也

傾河駕騰參、颺風折暮草、驚蔞賁層

林、時雲靄空遠、淵水結清深、奔樞豈易紐、珠庭  
不可臨、懷仁每多意、履順孰能禁、露清一唯促、  
緩志且移心、哀歌步梁甫、歎絕有遺音、

君子有所思行



城策終南首、顧望咸陽川、戚里遡層闕、甲館負  
崇軒、複塗希紫閣、重臺擬望仙、巴姬幽蘭奏、鄭  
女陽春絃、共矜紅顏日、俱忘白髮年、寂寥茂陵  
宅、照曜未央蟬、無以五鼎盛、顧嗤三經玄

白馬篇

白馬紫金鞍、停鑣過上蘭、寄言狹斜子、詎知隴  
道難、赤坂途三折、龍堆路九盤、冰生肌裏冷、風  
起骨中寒、功名志所急、日暮不遑餐、長驅入右  
地、輕舉出樓蘭、直去已垂涕、甯可望長安、匪期



定遠封。無羨輕車官。唯見恩義重。豈覺衣裳單。  
本持軀命答。幸遇身名完。

齊謳行

東秦稱右地。川隰固夷昶。層峰駕蒼雲。濁河流  
素壤。青邱良杳鬱。雪宮信疎敞。王佐改殷命。霸  
功繆周綱。

前緩聲歌

羽人廣宵宴。帳集瑤池東。開霞泛彩靄。澄霧迎  
香風。龍駕出黃苑。帝服起河宮。九疑轡煙雨。三



山馭螭鴻玉鑾，乃排月瑤輶，信凌空，神行燭立。  
漢帝旆委曾虹，簫歌美羸女，笙吹悅姬童，瓊漿  
且未洽，羽轡已騰空。息鳳曾城曲，滅景青都中。  
隆祐集皇代，委祚溢華嵩。

鼓吹曲二首同諸公賦

芳樹

發萼九華隈，開跗寒露側，氤氲非一香，參差多  
異色。宿昔寒飈舉，摧殘不可識，霜雪交橫至，對  
之長歎息。



臨高臺

高臺不可望，望遠使人愁。  
連山無斷絕，河水復悠悠。  
所思竟何在，洛陽南陌頭。  
可望不可見，何用解人憂。

洛陽道

洛陽大道中，佳麗實無比。  
燕裙傍日開，趙帶隨風靡。  
領上蒲萄繡，腰中合歡綺。  
佳人殊未來，薄暮空徙倚。

江南曲



櫂歌發江潭，采蓮渡湘南。宜須間隱處，舟浦子  
自諳。羅衣織成帶，墮馬碧玉簪。但令舟楫渡，甯  
計路嶄嵌。

### 東武吟行

天德深且曠，人世賤而浮。東枝纔拂景，西壑已  
停輶。逝辭金門寵，去飲玉池流。霄轡一永矣，俗  
畧從此休。

### 怨歌行

時屯甯易犯，俗險信難羣。坎壈元叔賦，頓挫敬



通文遽淪班姬寵、夙窆賈生墳、短俗同如此、長歌何足云、

悲哉行

旅遊媚年春、年春媚遊人、徐光旦垂彩、和露曉凝津、時嚶起稚葉、蕙氣動初蘋、一朝阻舊國、萬里隔良辰、

携手曲

捨轡下雕輅、更衣捧玉牀、斜簪映秋水、開鏡比春粧、所畏紅顏促、君恩不可長、鷄冠且容裔、豈



客桂枝亡

有所思

西征登隴首，東望不見家。  
關樹抽紫葉，塞草發青芽。  
昆明當欲滿，蒲萄應作花。  
垂淚對漢使，因書寄狹斜。

夜夜曲 二曲

河漢縱且橫，北斗橫復直。  
星漢空如此，甯知心有憶。  
孤燈暖不明，寒機曉猶織。  
零淚向誰道，雞鳴徒歎息。



北斗闌干去夜夜，心獨傷。月輝橫射枕，燈光半隱牀。

釣竿

桂舟旣容與，綠浦復回紆。輕絲動弱芰，微楫起單鳬。扣舷忘日暮，卒歲以爲娛。

臨碣石

碣石送返潮，登岸禮朝日。溟漲無端倪，山島竝崇嶂。驥老心未窮，酬恩豈終畢。

湘夫人



瀟湘風已息，沅澧復安流。揚蛾一含睇，嫵媚好  
且脩。捐玦置澧浦，解珮寄中洲。

貞女引

貞女信無矯，傍鄰也見疑。輕生本非惜，賤軀良  
足悲。傳芳託嘉樹，弦歌寄好詞。

襄陽白銅鞮歌三首

分手桃林岸，送別峴山頭。若欲寄音信，漢水向  
東流。

生長宛水上，從事襄陽城。一朝遇神武，奮翼起



先鳴

蹀躞飛塵起，左右自生光。  
男兒得富貴，何必在歸鄉。

永明樂

聯翩貴遊子，侈靡千金客。  
華轂起飛塵，珠履竟長陌。

江南弄四首

以下雜言

趙瑟曲

英華作元帝今從樂府作沈約

邯鄲竒弄出文梓，縈絃急調切流徵。  
玄鶴徘徊



白雲起白雲起，鬱披香，離復合，曲未央。

秦箏曲

羅袖飄飄拂雕桐，促柱高張散輕宮，迎歌度舞  
遏歸風，遏歸風，止流月，壽萬春，歡無歇。

陽春曲

楊柳垂地驚差池，緘情忍思落容儀，弦傷曲怨  
心自知，心自知，人不見，動羅裙，拂珠殿。

朝雲曲

陽臺氤氲多異色，巫山高高上無極，雲來雲去



常不息，常不息，夢來遊極萬世，度千秋。

樂未央

億舜日，萬堯年，詠湛露，歌採蓮，願雜百花氣，宛轉金鑪前。

四時白紵歌五首 七言

古今樂錄曰：沈約云：白紵五章，勅臣約造，武帝造後兩句。

春白紵

蘭葉參差桃半紅，飛芳舞縠戲春風，如嬌如怨，狀不同，含笑流眄滿堂中，翡翠群飛飛不息，願



在雲間長比翼，佩服瑤草駐容色。舜日堯年歡無極。

夏白紵

英華作武帝，今從樂府作沈約。

朱光灼爍照佳人，含情送意遙相親。嫣然一轉亂心神，非子之故欲誰因。翡翠羣飛飛不息，願在雲間長比翼。佩服瑤草駐容色，舜日堯年歡無極。

秋白紵

白露欲凝草已黃，金瑄玉桂響洞房。雙心一意



共徊翔吐情寄君君莫忘翡翠羣飛飛不息願  
在雲間長比翼佩服瑤草駐容色舜日堯年歡  
無極

冬白紵

寒閨晝密羅幌垂婉容麗色心相知雙去雙還  
誓不移長袖拂面爲君施翡翠羣飛飛不息願  
在雲間長比翼佩服瑤草駐容色舜日堯年歡  
無極



秦箏齊瑟燕趙女一朝得意心相許明月如規  
方襲子夜長未央歌白紵翡翠羣飛飛不息願  
在雲間長比翼佩服瑤草駐容色舜日堯年歡  
無極



沈隱侯集

卷二

三



詩

侍皇太子釋奠宴

以下四言

尊學尚矣，道亦遐哉。啓圖觀秘，闢苑興才。事高東序，義邁雲臺。峩峩德傳，灼灼英台。復禮曲臺，反樂宣榭。闕文內舉，輶軒外駕。結朋千里，從師百舍。墜典必修，闕祀咸薦。迴鸞獻爵，挺金委奠。肆士辨儀，胥人掌縣。髣髴神蹤，徘徊靈睭。

爲南郡王侍皇太子釋奠宴二首

陵季相沿，訓隨世殆。政缺雅乖，風漓化改。禮亡



衽席樂沈河海三雍靡構四教誰采瞻震並峻  
義屬重麗橫書清道晦彼生知

義重師匠業貴虛受襄野順風西河杜帝表跡  
虧光降情迴首道御百靈神行萬有尊學尚矣  
繼列傳徽旗章或舛茲道莫違自堂及室異軫  
同歸洋洋聖範楚楚儒衣

三日侍鳳光殿曲水宴應制

光遲蕙畝氣婉椒臺皇心愛矣帝曰遊哉玉鸞  
徐警翠鳳輕迴別殿廣臨離宮洞啟川祗奉壽



河宗相禮、清洛漸筵、長伊流陛、洄盪嘉羞、搖漾  
芳醴、輕歌易繞、弱舞難持、素雲留管、玄鶴停絲、  
引思爲歲、歲亦陽止、叨服賁身、身亦昌止、徒勤  
丹漆、終愧文梓

爲臨川王九日侍太子宴

涼風北起、高鴈南翻、葉浮楚水、草折梁園、淒涼  
霜野、惆悵晨鷗、雲輕寒樹、日麗秋原、三金廣設、  
六羽高陳、寒英始獻、涼酎初醕、靡靡神襟、鏘鏘  
羣彦、思媚儲猷、洽和奉宴、恩暢蘭席、歡同桂殿、



景遽樂推臨風以眷麗景天枝位非德舉任伍  
辰階祚均河楚負嶽未勝瞻雲難侶望古興惕  
心焉載伫

九日侍宴樂遊苑

憑玉宅海端展御天止流飛壑靜震騰川凝神

貫

一作責

極擣道漏泉西裘委袵南風在絃暮芝

始緣年桂初丹上林葉下滄池水寒霜霑玉樹  
鴈動輕瀾停蹕玉陛徙衛璿墀琨箱鳳彩羽蓋  
鸞姿虹旌迢遞翠華葳蕤禮弘灞汭義高洛湄



從齊武帝瑯琊城講武應詔

以下五言

九功播祧墀，七德陳武懸。  
展事昌國圖，息兵由重戰。  
皇情咨閔典，出車追辰選。  
飾徒映寒隰，翻綏臨廣甸。  
颯沓佩吳戈，參差腰夏箭。  
風旆舒復卷，雲霞清以轉。  
輕舞信徘徊，前歌且遙衍。  
秋原嘶代馬，朱光浮楚練。  
虹壑寫飛文，巖阿藻餘綬。  
發震嶽靈從，揚旌水華變。  
憑高訓武則，中天起遐眷。  
鳳蓋捲洪河，珠旗掃長汧。  
方侍翠華舉，遠適瑤池宴。



三日侍林光殿曲水宴應制

宴鎬鏘玉鑾，遊汾舉仙輶。  
榮光泛彩旄，脩風動芝蓋。  
淑氣婉登晨，天行聳雲旆。  
帳殿臨春籞，帷宮繞芳薈。  
漸席周羽觴，分墀引迴瀨。  
穆穆玄化升，濟濟皇階泰。  
將御遺風軫，遠侍瑤臺會。

侍宴樂遊苑餞呂僧珍應詔

丹浦非樂戰，負重切君臨。  
我皇秉至德，忘已用堯心。  
愍茲區宇內，魚鳥失飛沈。  
推轂二嶠阻，揚旆九河陰。  
超乘盡三屬，選士皆百金。  
戎車出細柳，



柳。餞席遵上林。命師誅後服。授律緩前禽。函輟  
方解帶。驍武稍披襟。伐罪芒山曲。弔民伊水潯。  
將陪告成禮。待此未抽簪。

正陽堂宴勞凱旋

凱入同高宴。飲至均多祐。昔往歌采薇。今來歡  
杖杜。善戰惟我皇。勝之不窺戶。推轂授神謨。餘  
壯終能賈。浩蕩金罍溢。周流玉觴傳。

遊鍾山詩應西陽王教

五章

靈山紀地德。地險資嶽靈。終南表秦觀。少室邇



王城翠鳳翔淮海，衿帶遶神垆。北阜何其峻，林薄沓蔥菁。

發地多奇嶺，干雲非一狀。合沓共隱天，參差互相望。鬱律構丹巖，峻嶒起青嶂。勢隨九疑高，氣與三山壯。

卽事旣多美，臨眺殊復奇。南瞻儲胥觀，西望昆明池。山中咸可悅，賞逐四時移。春光發隴首，秋風生桂枝。

多值息心侶，結架山之足。八解鳴澗流，四禪隱



巖曲窈冥終不見，蕭條無可欲。所願從之遊，寸心於此足。

君王挺逸趣，羽旆臨崇基。白雲隨玉趾，青霞襍桂旗。淹留訪五藥，顧步伫三芝。於焉仰鑣駕，歲暮以爲期。

### 登高望春

登高眺京洛，街巷紛漠漠。迴首望長安，城闕鬱盤桓。日出照鈿黛，風過動羅紈。齊童躡朱履，趙女揚翠翰。春風搖襍樹，歲蕤綠且丹。寶瑟玫瑰



枉金羈玳瑁鞍，淹留宿下蔡。置酒過上蘭，解眉  
還復斂。方知巧笑難，佳期空靡靡。含睇未成歡，  
嘉客不可見。因君寄長歎。

遊金華山

遠策追夙心，靈山協久要。天倪臨紫闕，地道通  
丹竅。未乘琴高鯉，且縱嚴陵釣。若蒙羽駕迎，得  
奉金書召。高馳入閭闔，方覩靈妃笑。

劉真人東山還

連峯竟無已，積翠遠微微。寥戾野風急，芸黃秋



草腓我來歲云暮於此悵懷歸霜雪方共下甯  
止露霑衣待余兩岐秀去去掩柴扉

登立暢樓

危峰帶北阜高頂出南岑中有陵風榭迴望川  
之陰岸險每增減湍平互淺深水流本三派臺  
高乃四臨上有離羣客客有慕歸心落暉映長  
浦煥景燭中潯雲生嶺乍黑日下溪半陰信美  
非吾土何事不抽簪

酬謝宣城眺臥疾



王喬飛鳧舄、東方金馬門、從宦非宦侶、避世作  
避諠、揆予發皇鑒、短翮屢飛翻、晨趨朝建禮、晚  
沐臥郊園、賓至下塵榻、憂來命緣尊、昔賢侔時  
雨、今守馥蘭蓀、神交疲夢寐、路遠隔思存、牽拙  
謬東汜、浮情及西崑、顧循良菲薄、何以儷璵璠  
將隨渤澥去、刷羽汎清源、

新安江至清淺深見底貽京邑遊好

眷言訪舟客、茲川信可珍、洞徹隨清淺、皎鏡無  
冬春、千仞寫喬樹、百丈見遊鱗、滄浪有時濁、清



濟涸無津，豈若乘斯去。俯映石磷磷，紛吾隔囂。  
滓。甯假濯衣巾，願以潺湲水。霑君纓上塵。

送別友人

外編作任  
昉者非

君東我亦西，銜悲涕如霰。浮雲一南北，何由展  
言宴。方作異鄉人，贈子同心扇。遙裔發海鴻，連  
翻出簷燕。春秋更去來，參差不相見。

去東陽與吏民別

微薄叨今幸，泰荷非昔期。唐風豈異世，欽明重  
在茲。飾駿去關輔，分竹八河淇。下車如昨日，曳



組忽彌碁霜載凋秋草風三動春旗無以招卧  
轍甯望後相思

早發定山

夙齡愛遠壑晚蒞見奇山標峰綵虹外置嶺白  
雲間傾壁忽斜豎絕頂復孤圓歸海流漫漫出  
浦水濺濺野棠開未落山櫻發欲然忘歸屬蘭  
杜懷祿寄芳荃眷言採三秀徘徊望九仙

循役朱方道路

分繻出帝京升裝奉皇穆洞野屬滄溟聯郊迺



河服、日映青邱島、塵起邯鄲陸、江移林岸微、巖  
深、煙岫複、歲嚴摧、磴草午寒散、嶠木縈、蔚夕颺、  
卷、蹉跎晚雲伏、霞志非易從、旌軀信難牧、豈慕  
瀋、宮梧方辭、兔園竹、羈心亦何言、逃蹤庶能復、

和竟陵王遊仙詩二首

夭

一作矯

一作矯

乘絳仙、螭衣方陸離、玉鑾隱雲

霧溶溶、紛上馳、瑤臺風不息、赤水正漣漪、崢嶸  
玄圃上、聊攀瓊樹枝、

朝止閭闔宮、暮宴清都闕、騰蓋擁奔星、低鑾避



行月九疑紛相從、虹旌乍升沒、青鳥去復還、高唐雲不歇、若華有餘照、淹留且晞髮、

遊沈道士館

秦皇御宇宙、漢帝恢武功、歡娛人事盡、情性猶未充、銳意三山上、托慕九霄中、旣表祈年觀、復立望仙宮、甯爲心好道、直由意無窮、曰余知止足、是願不須豐、遇可淹留處、便欲息微躬、山嶂遠重疊、竹樹近蒙籠、開襟濯寒水、解帶臨清風、所累非物外、爲念在玄蹤、朋來握石髓、賓至駕



輕鴻都令人徑絕、惟使雲路通、一舉凌倒景、無事適華嵩、寄言賞心客、歲暮爾來同、

還園宅奉酬華陽先生

早欲尋名山、期待婚嫁畢、二事雖云已、此外復非一、忽聞龍圖至、仍覩榮光溢、副朝首八元、開壤賦千室、冠纓曾弗露、風雨未嘗櫛、鳴玉響洞門、金蟬映朝日、暫無小人報、徒叨令尹秩、豈忘平生懷、靡盬不遑恤、

華陽先生登樓不復下贈呈



側聞上士說、尺木乃騰霄、雲駢不展地、仙居多  
麗譙、臥待三芝秀、坐對百神朝、銜書必青鳥、佳  
客信龍鑣、非止靈桃實、方見大椿凋、

酬華陽陶先生

三清未可覲、一氣且空存、所願迴光景、拯難拔  
危魂、若蒙九丹贈、豈懼六龍奔、

奉華陽王外兵

餐玉駐年齡、吞霞反容質、眇識青邱樹、迴見扶

桑日爛熳、蜃雲舒嶽、崑山海出、



赤松澗

松子排煙去，英靈眇難測。惟有清澗流，潺湲終  
不息。神丹在茲化，雲輶於此陟。願受金液方，片  
言生羽翼。渴就華池飲，饑向朝霞食。何時當來  
還，延伫青巖側。

八關齋

因戒倦輪飄，習障從塵染。四衢道難闢，八正扉  
猶掩。得理未易期，失路方知險。迷塗旣已復，豁  
悟非無漸。



古意

挾瑟叢臺下。徙倚愛容光。佇立日已暮。戚戚苦  
人腸。露葵已堪摘。淇水未沾裳。錦衾無獨暖。羅  
衣空自香。明月雖外照。甯知心內傷。

少年新婚爲之詠

山陰柳家女。薄言出田野。丰容好姿顏。便僻巧  
言語。腰肢旣軟弱。衣服亦華楚。紅輪映早寒。畫  
扇迎初暑。錦履並花紋。繡帶同心苴。羅襦金薄  
厠。雲鬢花釵舉。我情已鬱紆。何用表崎嶇。託意



眉間黛申心口上朱莫爭三春價坐喪千金軀  
盈尺青銅鏡徑寸合浦珠無因達往意欲寄雙  
飛鳬裾開見玉趾衫薄映凝膚羞言趙飛燕笑  
殺秦羅敷自顧雖倅薄冠蓋曜城隅高門列騶  
駕廣路從驪駒何慚鹿盧劒詎減府中趨還家  
問鄉里詎堪特作夫

夢見美人

夜聞長歎息知君心有憶果自閨闔開魂交覩  
顏王臺作容色既薦巫山枕又奉齊眉食立望復橫



陳忽覺非在側。那知神傷者。潺湲淚沾臆。

直學省愁卧

秋風吹廣陌。蕭瑟入南闌。愁人掩軒臥。高窗時  
動扉。虛館清陰滿。神宇曖微微。網蟲垂戶織。夕  
鳥傍欄飛。纓珮空爲忝。江海事多違。山中有桂  
樹。歲暮可言歸。

休沐寄懷

雖云萬重嶺。所翫終

一作惟

一邱。堦墀幸自足。安

事遠遨遊。臨池清潄暑。開幌望高秋。園禽與時



同根應節抽，憑軒寒木末。垂堂對水周，紫籜  
開綠篠。白鳥映青疇，艾葉彌南浦。荷花遶北樓，  
送日隱層閣。引月入輕幃，爨熟寒蔬翦。賓來春  
蟻浮，來往旣云勤。光景爲誰留。

### 宿東園

陳王鬪雞道，安仁採樵路。東郊豈異昔，聊可閒  
余步。野徑旣盤紆，荒阡亦交互。槿籬疎復密，荆  
扉新且故。樹頂鳴風飈，草根積霜露。驚麕去不  
息，征鳥時相顧。茅棟嘯愁鴟，平岡走寒兔。夕陰



帶層阜、長煙引、輕素飛、光忽我、適豈止、歲云暮、  
若蒙西山藥、頽齡倘能度、

行園

寒瓜方臥壠、秋菰亦滿陂、紫茄紛爛熳、綠芋鬱  
參差、初菰向堪把、時菰日離離、高梨有繁實、何  
減萬年枝、荒渠集野鴈、安用昆明池、

和左丞庾杲之病

歲暮豈云聊、參差憂與疾、匪澣孰能賜、持身固  
無述、握蘭空盈把、待漏終不溢、囂喧滿眼前、簿



領紛盈膝，安用談天辯。徒勞夢賜筆，挂冠若東  
都。山林甯復出，

和竟陵王抄書

教微因弛轡，維峻屬貞期。義乖良未遠，斯文煥  
在茲。超河綜絕禮，冠楚綴淪詩。披滕辨蠹冊，酌  
醴訪深疑。澄流黜任性，泛畧引前滋。漢壁含遺  
篆，名山多逸詞。綠編方委閣，素簡日盈輜。空幸  
參鴛鷺，此秀慙瓊芝。挹流旣知廣，復道還自嗤。  
奉和竟陵王郡縣名



西都富軒冕，南宮溢才彥。高闕連朱雉，方渠漸  
游殿。廣川肆河濟，長岑繞崤汧。曲梁濟危渚，平  
臯騁悠眄。清淵皎澄徹，曾山鬱葱蒨。陽泉濯春  
藻，陰邱聚寒霰。西華不可留，東光促奔箭。望都  
遊子懷，臨戎征馬倦。旣豫平章集，復齒南皮宴。  
一窺長安城，羞言杜陵掾。

奉和竟陵王藥名

丹草秀朱翹，重臺架危岳。木蘭露易飲，射干枝  
可結。陽隰採辛夷，寒山望積雪。玉泉亟周流，雲



華乍明滅合歡葉暮卷爵林聲夜切垂景迫連  
桑思仙慕雲埒荆實剖丹瓶龍芻汗奔血照握  
乃夜光盈車非玉屑細柳空葳蕤水萍終委絕  
黃符若可挹長生永昭誓

和陸慧曉百姓名

建都望淮海樹闕表衡稽井幹風雲出栢梁星  
漢齊皇王臨萬宇惠化覃黔黎吉士服仁義宿  
昔秉華主庸賢起幽谷欽言非象犀端委康國  
步偃息召邦攜舉政方分策易紀粲金泥伊余



沐嘉幸、由是別園畦、曾微涓露答光景、遂雲西、  
方隨煉丹子、薄暮矯行迷、

三月三日率爾成章

麗日屬元巳、年芳具在斯、開花已匝樹、流嚶復  
滿枝、洛陽繁華子、長安輕薄兒、東出千金堰、西  
臨鴈鷺陂、遊絲映空轉、高楊拂地垂、綠幘文照  
耀、紫燕光陸離、清晨戲伊水、薄暮宿蘭池、象筵  
鳴寶瑟、金瓶泛羽卮、甯憶春蠶起、日暮桑欲萎、  
長袂屢已拂、彫胡方自炊、愛而不可見、宿昔減



容儀且當忘情去，歎息獨何爲。

織女贈牽牛

紅粧與明鏡，二物本相親。用持施點畫，不照離  
居人。往秋雖一照，一照復還塵。塵生不復拂，蓬  
首對河津。冬夜寒如此，甯遽道陽春。初商忽云  
至，暫得奉衣巾。施衿已成故，每聚忽如新。

應王中丞思遠咏月

月華臨靜夜，夜靜滅氛埃。方暉竟戶入，圓影隙  
中來。高樓切思婦，西園遊上才。網軒映珠綴，應



門照綠苔洞房殊未曉、清光信悠哉、

和王中書德充詠白雲

白雲自帝鄉氛氲屢迴沒、蔽虧崑山樹含吐、瑤臺月、秋風西北起、飄我過城闕、城闕已參差、白雲復離離、皎潔在天漢、倒影入華池、將過丹邱野、時至碧林垂、九重迎飛燕、萬里送翔螭、

詠雪應令

思鳥聚寒蘆、蒼雲軫暮色、夜雪合且離、曉風驚復息、嬋娟入綺窗、徘徊驚情極、弱桂不勝枝、輕



飛屐低翼，玉山聊可望。瑤池豈難卽，

和劉雍州繪博山香爐

範金誠可則，摛思必良工。凝芳自朱燎，先鑄首  
山銅。瓌姿信岳嶠，奇態實玲瓏。峰磴互相拒，巖  
岫杳無窮。赤松遊其上，歛足御輕鴻。蛟螭盤其  
下，驤首盼層窮。嶺側多奇樹，或孤或複叢。巖間  
有佚女，垂袂似含風。暈飛若未已，虎視鬱餘雄。  
登山起重嶂，左右引絲桐。百和清夜吐，蘭煙四  
面克。如彼崇朝氣，觸石繞華嵩。



詠湖中鴈

白水滿春塘，旅鴈每迴翔。  
唼流牽弱藻，歛翮帶餘霜。  
羣浮動輕浪，單汎逐孤光。  
懸飛竟不下，亂起未成行。  
刷羽同搖漾，一舉還故鄉。

冬節後至丞相第詣世子車中作

廉公失權勢，門館有虛盈。  
貴賤猶如此，況在曲池平。  
高車塵未滅，珠履故餘聲。  
賓階綠錢滿，客位紫苔生。  
誰當九原上，鬱鬱望佳城。

奉和竟陵王經劉歊墓



素園欽逸軌，軼墓禮真魂。化塗終眇默，神理曖  
猶存。塵經一作駕未輟幌，高衡已委門。日蕪子雲  
舍，徒望董生園。華陰無遺布，楚席有靈樽。玄泉  
倘能慰，長夜且勿論。

### 悼亡

去秋三五月，今秋還照梁。今春蘭蕙草，來春復  
吐芳。悲哉人道異，一謝永銷亡。簾屏既毀撤，一作  
屏筵空帷席更施張。游塵掩虛座，孤帳覆空牀。  
萬事無不盡，徒令存者傷。



侍遊方山應詔

清漢夜昭皙，扶桑曉陸離。發歌縱陽下，

一作發吹垂楊

下建羽朝夕池，縱金浮水若。聳蹕昭山祇，一霑

九霄露。藜藿終自知。

樂將殫恩未已應詔

淒鏘笙管道，參差舞行亂。輕肩旣屢舉，長巾亦  
徐換。雲鬢垂寶花，輕粧染微汗。羣臣醉又飽，聖  
恩猶未半。

泛永康江



長枝萌紫葉，清源泛綠苔。山光浮水至，春色犯  
寒來。臨睨信永矣，望美曖悠哉。寄言幽閨妾，羅  
袖勿空裁。

錢謝文學離夜

漢池水如帶，巫山雲似濫。澌汨背吳潮，潺湲橫  
楚瀨。一望沮漳水，寧思江海會。以我徑寸心，從  
君千里外。

別范安成

生。平。少。年。日。分。手。易。前。期。及。爾。同。衰。暮。非。復。別。



離時。勿言一樽酒。明日難重持。夢中不識路。何  
以慰相思。

效古

可憐桂樹枝。單雄憶故雌。歲暮異栖宿。春至猶  
別離。山河隔長路。路遠絕容儀。豈云無可  
匹。寸心終不移。

玉臺作我

庭雨應詔

出空甯可圖。入庭倍難賦。非煙復非雲。如絲復  
如霧。霖霖裁欲垂。霏微不能注。雖無千金質。聊



爲一辰趣

初春

夾道覓陽春。相將共攜手。草色猶自腴。林中都  
未。有。無。事。逐。梅。花。空。教。信。楊。柳。且。復。共。歸。來。含  
情。寄。杯。酒。

春思

楊柳亂如絲。綺羅不自持。春草黃復綠。客心傷  
此。時。青。苔。已。結。洎。碧。水。復。盈。淇。日。華。照。趙。瑟。風  
色。動。燕。姬。襟。前。萬。行。淚。故。是。一。相。思。



傷春

弱草半抽黃、輕條未全綠、年芳被禁籞、煙花繞層曲、寒苔卷復舒、冬泉斷方續、早花散凝金、初露泣成玉、

秋夜

月落宵向分、紫煙鬱氛氲、噓噓螢入霧、離離鴈度雲、巴童暗理瑟、漢女夜縱裙、新知樂如是、久要豈相聞、

同詠樂器



詠簾

江南簫管地，玅響發孫枝。  
殷勤寄玉指，含情舉復垂。  
雕梁再三繞，輕塵四五移。  
曲中有深意，丹誠君詎知。

同詠坐上玩器

詠竹櫛榔盤

梢風有勁質，柔用道非一。  
平織方以文，窮成圓且密。  
薦羞雖百品，所貴浮天實。  
幸承歡醕餘，甯辭嘉宴畢。



簷前竹

萌開籜已垂，結葉始成枝。  
繁蔭上薊葺，促節下離離。  
風動露滴瀝，月照影參差。  
得生君戶牖，不願夾華池。

翫庭柳

輕陰拂建章，夾道連未央。  
因風結復解，霑露柔且長。  
楚妃思欲絕，班女淚成行。  
遊人未應去，爲此還故鄉。

麥李



青玉冠西海，碧石彌外區。化爲中園實，其下成  
路衢。在先良足貴，因小邈難逾。色潤房陵縹，味  
奪寒水朱。摘持欲以獻，尚食且踟蹰。

詠桃

風來吹葉動，風去畏花傷。紅英已照灼，況復含  
日光。歌童暗理曲，游女夜縫裳。詎減當春淚，能  
斷思人腸。

詠青苔

緣階已漠漠，汎水復綿綿。微根如欲斷，輕絲似



更聯長風隱細草，深堂沒綺錢。縈鬱無人贈，歲  
華徒可憐。

十詠二首

領邊繡

纖手製新奇，刺作可憐儀。縈絲飛鳳子，結縷坐  
花兒。不聲如動吹，無風自裊枝。麗色倘未歇，聊  
承雪髮垂。

脚下履

丹墀上颯袪，玉殿下趨鏘。逆轉珠珮響，先表繡



桂香。裾開臨舞席。袖拂繞歌堂。所歎忘懷妾。見  
委入羅牀。

懷舊詩九首

傷王融

元長秉奇調。弱冠慕前蹤。眷言懷祖武。一簣望  
成峰。途艱行易跌。命舛志難逢。折風落迅羽。流  
恨滿青松。

傷謝朓

吏部信才傑。文鋒振奇響。調與金石諧。思逐風



雲上。豈言陵霜質。忽隨人事往。尺璧爾何寃。一  
旦同邱懷。

傷庾杲之

左率馥時譽秀出冠朋僚。聳茲千仞氣。振此百  
尋條。蘊藉含文雅。散朗溢風飈。楸檟今已合。容  
範尚昭昭。

傷王謙

長史體閒任坦蕩。無外求。持身非詭遇。應物有  
虛舟。心從朋好盡。形爲歡宴留。歡宴未終畢。零



落委山邱

傷虞炎

東南旣擅美洛陽復稱才  
攜手同歡宴比跡共  
遊陪事隨短秀落言歸長夜臺

傷李珪之

少府懷貞節忘軀濟所奉吏道勤不息繁文長  
自擁旣闕優孟歌身沒誰爲寵

傷韋景猷

韋叟識前載博物備戎華稅驂止營校淪跡委



泥沙。始知庸聽局方悟大音賒。

傷劉渢

處和無近累天然有勝質。蕭瑟負高情。耿介懷  
秋實。義貴良爲重。蘭摧非所恤。一罷平生言。甯  
知攜手日。

傷胡諧之

豫州懷風範。綽然標雅度。處約志不渝。接廣情  
無忤。頡頏事刀筆。紛綸遶朱素。美志同山阿。浮  
年迫朝露。



詠新荷應詔

勿言草卉賤，幸宅天池中。微根纔出浪，短幹未  
搖風。甯知寸心裏，蓄紫復含紅。

聽蟬鳴應詔

輕生宅園籞，復得棲嘉樹。豈敢擅洪枝，輕條遭  
所遇。葉密形易揚，風迴響難住。

詠笙

彼美實枯枝，孤篠定參差。鷓鴣已啁哳，棗下復  
林離。本期王子宴，甯待洛濱吹。



詠箏

秦箏吐絕調、玉桂揚清曲、絃依高張斷、聲隨妙、  
指續、徒聞音繞梁、甯知顏如玉、

詠石榴

靈園同佳稱、幽山有奇質、停采久彌鮮、含華豈  
期實、長願微名隱、無使孤株出、

大言應令

隘此大汎庭、方知九垓局、窮天豈彌指、盡地不  
容足、



細言應令

開館尺椳餘築榭微塵裏蝸角列州縣毫端建  
朝市

詠餘雪

陰庭覆素芷南階褰綠葳玉臺新落構青山已  
半虧

詠帳

甲帳垂和璧螭雲張桂宮隋珠旣吐曜翠被復  
含風



侍宴詠反舌

假容不足觀、遺音猶可薦、幸蒙喬樹恩、得以聞、  
高殿

寒松

梢聳振寒聲、青蔥標暮色、疎葉望嶺齊、喬榦臨  
雲直、

詠孤桐

龍門百尺時、一作峙排雲少孤立、分根蔭玉池、欲

待高鸞集、



詠梧桐

秋還遽已落、春曉猶未萸、微葉雖可賤、一剪或成珪、

園橘

綠葉迎露滋、朱苞待霜潤、但令入玉梓、金衣非所恡、

詠梨應詔

大谷來旣重、岷山道又難、摧折非所恡、但令入玉盤、



西地梨

詩彙作  
簡文非

列茂河陽苑、蓄紫濫觴隈、翻黃秋沃若、落葉春  
徘徊、

詠芙蓉

微風搖紫葉、輕露拂朱房、中池所以綠待我、泛  
紅光、

詠杜若

生在窮絕地、豈與世相親、不顧逢采擷、本欲芳

幽人



詠鹿蔥

野馬不任騎、兔絲不任織、旣非中野花、無堪麋  
麋食、

甘蕉

抽葉固盈丈、擢本信兼圍、流甘揜椰實、弱縷冠  
絺衣、

詠菰

結根布洲渚、垂葉滿臯澤、匹彼露葵羹、可以留  
上客、



早行逢故人車中爲贈

殘朱猶曖曖餘粉尚霏霏  
昨宵何處宿今晨拂露歸

爲鄰人有懷不至

影逐斜月來香隨遠風入  
言是定知非欲笑翻成泣

阻雪連句

初昕逸翮舉日昃駑馬疲  
幽山有桂樹歲暮方參差



和劉中書仙詩二首

清旦發玄洲、日暮宿丹邱、崑山西北映流泉、東  
南流、霓裳拂流電、雲車委輕霰、崢嶸上不覩寥  
廓下無見、

殊庭不可及、風燐多異色、霞衣不待縫、雲錦不  
須織、

華山館爲國家營功德

沐芳禱靈嶽、稽首恭上玄、帝昔祈萬壽、臣今請  
億年、丹方緘洞府、河清時一傳、錦書飛雲字、玉



簡黃金編

和王衛軍解講

妙輪輟往駕、寶樹未開音、甘露爲誰演、得一標  
道心、眇眇立塗曠、高義總成林、七花屏塵相、八  
解濯芳襟、

侍宴謝朓宅餞東歸應制

皇情悵東舳、羽旆拂南廛、夏雲清朝景、秋風揚  
早蟬、飲和陪下席、論道光上筵、

酬孔通直過懷蓬居



聞闔既洞啟，龍樓亦高闢。兩宮集鸞步，二闥引  
通籍。伊邇事清途，紛吾供賤役。

石塘瀨聽猿

噉噉夜猿鳴，溶溶晨霧合。不知聲遠近，惟見山  
重沓。既歡東嶺唱，復伫西巖答。

出重圍和傅昭

魯連揚一策，陳平出六奇。邯鄲風雨散，白登煙  
霧維。排雲出九地，陵定振五巵。

秋晨羈怨望海思歸



分空臨澥霧，披遠望滄流。  
八桂暖如畫，三桑眇若浮。  
煙極希丹水，月遠望青邱。

侍宴樂游苑餞徐州刺史應詔

沃若動龍驂，參差凝鳳管。  
金塘草未合，玉池泉將滿。

憇郊園和約法師採藥

郭外三千畝，欲以買朝餽。  
繁蔬旣綺布，密菓亦星懸。

四城門老



六龍既驚軫，二鼠復馳光。衰齡難慎輔，暮質易凋傷。

上巳華光殿 七言

於維盛世，卽軒媯朝。酆宴鎬復在斯，朝光灼爍。  
映蘭池，春風婉轉，入細枝。時鸞顧慕，聲合離輕。  
波微動，漾羽卮。河宗海若生蛟螭，浮梁徑度跨。  
迴漪。朱顏始洽，景將移。安得壯士駐奔曦。

六憶詩四首

以下  
襍言

憶來時，灼灼上堦墀。勤勤叙別離，慊慊道相思。



沙隱集 卷二  
相看常不足相見乃忘饑

憶坐時點點羅帳前或歌四五曲或弄兩三絃。  
笑時應無比。嗔時更可憐。

憶食時臨盤動容色欲坐復羞坐欲食復羞食。  
含哺如不饑擎甌似無力。  
憶眠時人眠彊未眠解羅不待勸就枕更須牽。  
復恐傍人見嬌羞在燭前。

八詠詩

登臺望秋月



至秋月，秋月光如練，照曜三爵臺，徘徊九華殿。  
九華玳瑁梁，華棖與璧璫，以茲雕麗色，持照明  
月光，凝華入黼帳，清輝懸洞房，先過飛燕戶，却  
映班姬牀，桂宮裊裊落桂枝，早寒淒淒凝白露，  
上林晚葉颯颯鳴，鴈門早鴻離離度，湛秀質兮  
似規，委清光兮如素，照愁軒之蓬髮，影金堦之  
輕步，居人臨此笑，以歌別客對之傷，且慕經衰  
圃，映寒叢，凝清夜，帶秋風，隨庭雪，以偕素，與池  
荷而共紅，臨玉墀之皎皎，含霜鬻之濛濛，躡天



衢而徙度，轢長漢而飛空，隱巖崖而半出，隔帷  
幌而纔通，散朱庭之奕奕，入青瑣而玲瓏，寒階  
悲寡鶴，沙洲怨別鴻，文姬泣胡殿，昭君思漢宮，  
余亦何爲者，淹留此山東。

### 會圃臨東風

臨春風，春風起春樹，遊絲暖如網，落花霧似霧，  
先泛天淵池，還過細柳枝，蝶逢飛，搖颺燕值羽，  
差池揚桂旆，動芝蓋，開燕裾，吹趙帶，趙帶飛，參  
差燕裾合，且離迴，簪復轉，黛顧步，惜容儀，容儀



已、炤、灼、春、風、復、迴、薄、氛、氲、桃、李、花、青、跗、含、素、萼、  
既、爲、風、所、開、復、爲、風、所、落、搖、綠、蒂、抗、紫、莖、舞、春、  
雪、襍、流、鶯、曲、房、開、今、金、鋪、響、金、鋪、響、今、妾、思、驚、  
梧、臺、未、陰、淇、川、始、碧、迎、行、雨、於、高、唐、送、歸、鴻、於、  
碣、石、經、洞、房、響、紈、素、感、幽、閨、思、帷、轡、想、芳、園、今、  
可、以、遊、念、蘭、翹、今、漸、堪、摘、拂、明、鏡、之、冬、塵、解、羅、  
衣、之、秋、襪、既、鏗、鏘、以、動、佩、又、細、縕、而、流、射、始、搖、  
蕩、以、入、閨、終、徘、徊、而、緣、隙、鳴、珠、簾、於、綉、戶、散、芳、  
塵、於、綺、席、是、時、悵、思、歸、安、能、久、行、役、佳、人、不、在、



茲春風誰爲惜

歲暮愍衰草

愍衰草衰草無容色  
憔悴荒逕中寒芳不可識  
昔時兮春日昔日兮春風  
銜花兮佩實垂綠兮  
散紅氛氤鴉鵲右  
照曜望仙東送歸顧慕泣淇  
水嘉客淹留懷上宮  
巖甌兮海岸冰多兮霰積  
爛熳兮巖根攢幽兮石隙  
布綿密於寒臯吐纖  
疎於危石旣惆悵於君子  
倍傷心於行役露縞  
枝於初旦霜紅天於始夕  
彫芳卉之九衢賁靈



茅之三春風急峭道難。秋至客衣單。旣傷簷下菊。復悲池上蘭。飄落逐風盡。方知歲早寒。流螢暗明燭。鴈聲斷纔續。委絕長信宮。蕪穢丹墀曲。霜奪莖上紫。風銷葉中綠。山變今青薇。水折今黃葦。秋鴻今疎引。寒鳥今聚飛。徑荒寒草合。桐長舊巖圍。一作草長荒徑微園庭漸蕪沒。霜露日霑衣。願逐晨征鳥。薄暮共西歸。

霜來悲落桐

悲落桐。落桐早。霜露燕至。葉未抽。鴻來枝已素。



本出龍門山，長枝仰刺天。上峰百丈絕，下趾萬尋懸。幽根未蟠結，孤株復危絕。初不照光景，終年負霜雪。自顧無羽儀，不願生曲池。芬芳本自乏，華實無所施。公子特留盼，王孫少見知。分取孤生枿，徒置北堂陲。宿莖抽晚幹，新葉生故枝。故枝雖遼遠，新葉頗離離。春風一朝至，榮華坐如斯。自惟良菲薄，君恩徒照灼。顧已非嘉樹，空用憑阿閣。願作清廟琴，爲君舞玄鶴。薜荔可爲裳，文杏堪作梁。勿言草木賤，徒照君末光。末光



不往照爲君含噉咷。

一作  
聶

陽柯淥水絃。陰枝苦

寒調。厚德非所任。敢不虛其心。若逢陽春至。吐

綠照清潯。

### 夕行聞夜鶴

聞夜鶴。夜鶴叫南池。對此孤明月。臨風振羽儀。  
伊吾人之菲薄。無賦命之天爵。抱跼促之短懷。  
隨冬春而哀樂。愍海上之驚鳧。傷雲間之離鶴。  
離鶴昔未離迴。發天北垂。忽遇疾風起。暫下昆  
明池。復畏冬水合。水宿非所宜。欲棲不可住。欲



去飛已疲、勢逐疾風舉、求溫向衡楚、復值南飛  
鴻。參差共成侶。海上多雲霧。蒼茫失洲嶼。自此  
別故羣、獨向瀟湘渚。故羣不離散、相依江海畔。  
夜止羽相切、晝飛影相亂。刷羽共浮沈、湛澹泛  
清潯。既不經別離、安知慕侶心。九冬負霜雪、六  
翩飛不任。且養凌雲翅、俛仰弄清音。所望浮丘  
子、旦夕來相尋。

晨征聽曉鴻

聽曉鴻、曉鴻度將旦、跨弱水之微瀾、發成山之



遠岸怵春歸之未幾，傷此歲之云半。出海漲之  
蒼茫，入雲途之瀰漫。無東西之可辨，孰遐邇之  
能算。微昔見於洲渚，赴秋期於江漢。集勁風於  
弱軀，負重雪於輕翰。寒溪可以飲，荒臯可以竄。  
溪水徒自清，微容豈足翫。秋蓬飛兮未極，塞草  
寒兮無色。吳山高兮高難度，越水深兮深不可  
測。羨明月之馳光，顧征禽之駛翼。伊余馬之屢  
懷，知君行之未極。一作息夜綿綿而難曉，愁參差  
而盈臆。望山川悉無似，唯星河猶可識。孤鴈夜



南飛、客淚夜沾衣、春鴻旦暮返、客子方未歸、歲  
去歡娛盡、年來容貌衰、一作非攬袵形雖是、撫臆  
事多違、青綯雖長復易解、白雲誠遠詎難依、

解佩去朝市

去朝市、朝市深、

一作晨

歸暮、辭北纓而南徂、浮東

川而西顧、逢天地之降祥、值日月之重光、伊吾

行之未已、

一作伊當  
仁之菲薄

非余情之信芳、充待詔於

金馬、奉高宴於栢梁、觀鬪獸於虎圈、望窈窕於

披香、遊西園兮登銅雀、攀青璫兮眺重陽、講金



非今議宣室，畫武帳。今夕文昌佩，甘泉今屣五。  
柞簪杵，音詣今黻承光，託後車。今侍華幄，游渤

海。今泛清漳，天道有盈缺。寒暑遞炎涼，一朝賣  
玉椀。眷眷惜餘香，曲池無復處。桂枝亦銷亡，清  
廟徒肅肅。西陵久茫茫，薄暮余多幸。嘉運重來  
昌，泰稽郡之南。尉典千里之光，貴別北芒於濁  
河。戀橫橋於清渭，望前軒之早桐。對南階之初  
卉，唯余情之屢傷。豈茲焉之能慰，眷昔日今懷  
哉。歲將暮，今歸去來。



被褐守山東

守山東山東萬里鬱青蔥兩溪共一瀉水潔望  
如空岸側青莎被巖間丹桂叢上瞻旣隱軫下  
睇亦溟濛遠林響咆獸近樹聒鳴蟲路帶若溪  
右澗吐金華東萬仞倒危石百丈注懸淙掣曳  
瀉流電奔飛似白虹洞井含清氣漏穴吐飛風  
玉竇膏滴瀝石乳室空籠峭嶇塗彌險巖岨步  
纔通余捨平生之所愛歛暮年之此逢欲一去  
而不還悵鄒一作恨邦衣之未褫揖林壑之清曠事



氓俗之紛詭，幸帝德之方升。值天綱之未毀，旣  
除舊而就新。故化民而俗徙，播趙俗以南徂。扇  
齊風以東靡，乳雉方可馴。流蝗庶能弭，清心矯  
世濁。儉政救民侈，秩滿撫白雲。淹留事芝髓，



世謂能知者其遊越前白雲並寄電之聞  
又於以車如馬駛式下便流無以流其心亦  
謂其言其所以見足前其言其言其言其言  
其言其言其言其言其言其言其言其言其言



附錄

本傳

沈約字休文、吳興武康人也、祖林子宋征虜將軍、父璞淮南太守、璞元嘉末被誅、約幼潛竄、會赦免、旣而流寓孤貧、篤志好學、晝夜不倦、母恐其以勞生疾、常遣減油滅火、而晝之所讀、夜輒誦之、遂博通羣籍、能屬文、起家奉朝請、濟陽蔡興宗聞其才而善之、興宗爲郢州刺史、引爲安西外兵參軍、兼記室、興宗嘗謂其諸子曰、沈記



室人倫師表。宜善事之。及爲荊州。又爲征西記  
室參軍。帶關西令。與宗卒。始爲安西。晉安王法  
曹參軍。轉外兵。並兼記室。入爲尚書度支郎。齊  
初爲征虜記室。帶襄陽令。所奉之王。齊文惠太  
子也。太子入居東宮。爲步兵校尉。管書記。直永  
壽省。校四部圖書。時東宮多士。約特被親遇。每  
直入見景斜方出。當時王侯到宮。或不得進。約  
每以爲言。太子曰。吾生平懶起。是卿所悉。得卿  
談論。然後忘寢。卿欲我夙興。可恒早入。遷太子



尋令後以本官兼著作郎遷中書郎本邑中正  
司徒右長史黃門侍郎時竟陵王亦招士約與  
蘭陵蕭琛琅琊王融陳郡謝朓南鄉范雲樂安  
任昉等皆遊焉。當世號爲得人。俄兼尚書左丞  
尋爲御史中丞轉車騎長史隆昌元年除吏部  
郎出爲甯朔將軍東陽太守明帝卽位進號輔  
國將軍徵爲五兵尚書遷國子祭酒明帝崩政  
歸冢宰尚書令徐孝嗣使約撰定遺詔遷左衛  
將軍尋加通直散騎常侍永元二年以母老表



求解職。改授冠軍將軍、司徒左長史、征虜將軍。  
南清河太守。高祖在西邸，與約遊舊建康城，平  
引爲驃騎司馬將軍如故時。高祖勲業旣就，天  
人允屬，約嘗扣其端，高祖默而不應。他日又進  
曰：「今與古異，不可以淳風期萬物。」士大夫攀龍  
附鳳者，皆望有尺寸之功，以保其福祿。今童兒  
牧豎，悉知齊祚已終，莫不云：「明公其人也。」天文  
人事，表革運之徵。永元以來，尤爲彰著。識云：「行  
中水作天子。」此又慙然在記，天心不可違，人情



不可失。苟是厯數所至。雖欲謙光。亦不可得已。  
高祖曰。吾方思之。對曰。公初杖兵樊沔。此時應  
思。今王業已就。何所復思。昔武王伐紂。始入民  
便曰。吾君武王。不違民意。亦無所思。公自至京  
邑。已移氣序。比於周武。遲速不同。若不早定大  
業。稽天人之望。脫有一人立異。便損威德。且人  
非金玉。時事難保。豈可以建安之封。遺之子孫。  
若天子還都。公卿在位。則君臣分定。無復異心。  
君明於上。臣忠于下。豈復有人方更同公作賊。



高祖然之。約出。高祖召范雲告之。雲對畧同。約  
旨。高祖曰。智者乃爾。暗同卿。明早將休文更來。  
雲出語約。約曰。卿必待我雲許諾。而約先期入。  
高祖命草其事。約乃出懷中詔書并諸選置。高  
祖初無所改。俄而雲自外來。至殿門不得入。徘徊  
壽光閣外。但云咄咄。約出問曰。何以見處。約  
舉手向左。雲笑曰。不乖所望。有頃。高祖召雲。謂  
曰。生平與沈休文羣居。不覺有異人處。今日才  
智縱橫。可謂明識。雲曰。公今知約不異。約今知



公高祖曰、我起兵於今三年矣、功臣諸將實有其勞、然成帝業者、乃卿二人也。梁臺建、爲散騎常侍、吏部尚書、兼右僕射。高祖受禪、爲尚書僕射、封建昌縣侯、邑千戶、常侍如故。又拜約母謝爲建昌國太夫人。奉策之日、左僕射范雲等二十餘人咸來致拜。朝野以爲榮。俄遷尚書左僕射、常侍如故。尋兼領軍、加侍中。天監二年、遭母憂、輿駕親出臨弔、以約年衰不宜致毀、遣中書舍人斷客節哭起、爲鎮軍將軍、丹陽尹、置佐史。



服闋遷侍中。右光祿大夫領太子詹事。揚州大中正。關尚書八條事。遷尚書令。侍中詹事中正如故。累表陳讓。改授尚書左僕射。領中書令。前將軍置佐史。侍中如故。尋遷尚書令。領太子少傅。九年。轉左光祿大夫。侍中少傅如故。給鼓吹一部。初。約久處端揆。有志台司。論者咸謂爲宜。而帝終不用。乃求外出。又不見許。與徐勉素善。遂以書陳情于勉。勉爲言于高祖。請三司之儀。弗許。但如鼓吹而已。約性不飲酒。少嗜欲。雖時



遇隆重而居處儉素。立宅東田。矚望郊阜。嘗爲  
郊居賦。尋加特進。光祿侍中。少傅如故。十二年  
卒。官時年七十三。詔贈本官。賻錢五萬。布百匹。  
謚曰隱約。左目重瞳。子腰有紫志。聰明過人。好  
墳籍。聚書至三萬卷。京師莫比。少時孤貧。丐于  
宗黨。得米數百斛。爲宗人所侮。覆米而去。及貴。  
不以爲憾。用爲郡部傳。嘗侍讌。有妓師。是齊文  
惠宮人。帝問識座中客。不曰。惟識沈家令。約伏  
座流涕。帝亦悲焉。爲之罷酒。約歷仕三代。該悉



舊章博物洽聞當世取則謝立暉善爲詩任彥  
昇工于文章約兼而有之然不能過也自負高  
才昧于榮利乘時藉勢頗累清談及居端揆稍  
弘止足每進一官輒殷勤請退而終不能去論  
者方之山濤用事十餘年未嘗有所薦達政之  
得失唯唯而已初高祖有憾于張稷及稷卒因  
與約言之約曰尚書左僕射出作邊州刺史已  
往之事何足復論帝以爲婚家相爲大怒曰卿  
言如此是忠臣邪乃輦歸內殿約懼不覺高祖



起猶坐如初及還未至牀而憑空頓于戶下因  
病夢齊和帝以劒斷其舌召巫視之巫言如夢  
乃呼道士奏赤章于天稱禪代之事不由已出  
高祖遣上省醫徐奘視約疾還具以狀聞先此  
約嘗侍讌值豫州獻栗徑寸半帝奇之問曰栗  
事多少與約各疏所憶少帝三事出謂人曰此  
公護前不讓卽羞死帝以其言不遜欲抵其罪  
徐勉固諫乃止及聞赤章事大怒中使譴責者  
數焉約懼遂卒有司謚曰文帝曰懷情不盡曰



隱故改爲隱云所著晉書百一十卷宋書百卷  
齊紀二十卷高祖紀十四卷邇言十卷謚例十  
卷宋文章志二十卷文集一百卷皆行於世又  
撰四聲譜以爲在昔詞人累千載而不寤而獨  
得胸衿窮其妙旨自謂入神之作高祖雅不好  
焉帝問周捨曰何謂四聲捨曰天子聖哲是也  
然帝竟不遵用

陳吏部尚書姚察曰昔木德將謝昏嗣流虐慄  
慄黔黎命懸晷漏高祖義拯橫潰志甯區夏謀



謨帷幄。寔寄良平。至於范雲沈約參預締構贊  
成帝業加雲以機警明瞻濟務益時約高才博  
洽名亞遷董俱屬興運蓋一代之英偉焉。



沈隱侯集卷二終







